





*Morgan* *1874* *1874* 5.

ADVERTISSEMENT  
D E  
NICOCLEON  
A  
CLEONVILLE  
S V R  
SON ADVERTISSEMENT  
A V X  
PROVINCES.

M. DC. XXXII.







ADVERTISSEMENT  
DE  
NICOCLEON  
A  
CLEONVILLE  
SVR  
SON ADVERTISSEMENT  
AVX  
PROVINCES.



LEONVILLE, ce n'est pas l'apprehension de ton stile, mais l'horreur de ton discours, qui m'a faict dire, apres auoir leu ton escrit, ces paroles de Daud : *Sauuez moy* psal. 111.

*Seigneur, parce que les veritez ont esté affoiblies, ou fardées par les enfans des hommes. I'ay recognu, que tu auois eu plus de soing de faire vn bel ou-*

urage, que de le rendre bon; que tu as trauaillé avec esperance d'estre recompensé, & sans crainte d'estre censuré; & que ton dessein a esté d'acquiescer la reputation de gentil Escriuain, plustost que d'homme de bien. C'est toute la loüange, que ma conscience me permet de te donner, au mesme temps qu'elle me force de te dire, que ton mensonge peut passer parmy les esprits communs, pour vne assez iolie & assez bien parée desbauchée: mais les plus releuez diront que tu es semblable à cet ouurier, qui dans le desespoir de ne pouuoir peindre Heleine avec quelques traicts de beauté, la couurit toute d'or.

Nous auons veu les mesmes choses que tu as dict, dans le liuret du Seigneur des Montagnes, auquel on a respondu: tout ce que tu as adiousté à cette vieille piece, est vn peu de fard. Nous descouurons, que tu presentes sur le theatre de l'effronterie les mesmes calomnies mieux coiffées; tu as aussi employé plus de temps pour les agencer. En fin, Cleonuille est des Montagnes mieux couuert: celuy-là auoit faict voir ses menteries vestuës en furies, tu les habilles en damoi-



damoifelles : fes flatteries eftoient puantes, les  
 tiennes font parfumées : il aboyoit comme la  
 Charybde, tu chantes comme les Sirenes:il don-  
 noit du poison, comme vn pauvre Moine, dans  
 vne escuelle de terre, dans laquelle il beuvoit de-  
 uant qu'il eust quitté le Conuent ; tu le presen-  
 tes dans vn verre de cristal : il a meflé le sublimé  
 dans du pain bis, tu l'as glacé fur du maffepain:  
 fa baue estoit celle d'vn fale crapaut, ton venin  
 est celuy du serpent scytale : & ie peux dire, que  
 ton dessein a esté semblable à celuy de ce riche  
 meschant, qui dans les Declamations de Quin-  
 tilian empoisonna les fleurs de son iardin, pour  
 faire mourir les abeilles du pauvre homme son  
 voisin, qui les venoient succeter; tu as respandu  
 ton poison sur quelques fleuretes, antitheses, pe-  
 tits rencontres, mots choisis, pour corrompre les  
 esprits des curieux sans iugement, qui estiment  
 les choses par les paroles, & qui croient, que  
 tout ce qui est assez bien escrit, a esté faict avec  
 iustice & verité. On void bien que tu as esté le  
 premier, auquel ton ouurage a agréé ; & on s'i-  
 imagine que tu l'as souuent recité à toy mesme,



en branlant la teste, & frappant du pied. Contemple & ayme toy, tant que tu voudras, dans ton ouurage: si tu te plonges & te perds là dedans, tu ne peux iamais estre changé en Narcisse, & encore moins en vne Immortelle, tu seras plustost vne Hemerocale; ta beauté ne pouuant durer vn iour, mais seulement autant de temps qu'on en peut employer pour lire ton escrit la premiere fois. Et afin que tu recognoisses, que ce n'est pas l'enuie qui me porte à iuger ainsi de tes escrits; ie te marqueray quelques points, dans lesquels ie feray voir tes fautes & impostures, mesmes à ton aueuglement.

Tu commences par l'Afrique, qui produict tous les ans quelque monstre, à cause du meslange des animaux de diuerses especes qui se rencontrent aupres des eaux fort rares en ce pays là: tu n'as pas pris garde que le nom de Cleonuille, que tu as choisi, estant composé du Grec & du François, ne peut signifier autre chose qu'un monstre; & ce mot de Roman nous faict croire que ton liuret est vne fable plustost qu'une histoire. Tu dis que tu es la gloire de ta Ville: cela seroit bon,

si

si apres Sidonius Apollinaris elle n'auoit plus porté de tres-sages & tres-sçauans hommes, en toute sorte de professions; & si Sauaron & ton oncle n'en estoient point fortis vn peu deuant toy.

Tu enuoyes vn Aduertissement aux Prouinces, & ne leur donnes aucun aduis salutaire, ny la bonne nouuelle de leur soulagement; qu'elles receuroient avec plus de ioye que ton papier, qui ne contient ny vne recepte, ny vn remede, contre les maux qui les accablent. Tu t'esgayes en ton exorde assez long; & deuant que de frapper de ton espadon, tu faiçts cent moulinets en l'air, croyant que nous aurons peur lors que nous le verrons briller au soleil: ou pour mieux dire, apres nous auoir faiçt attendre vn bon repas, le premier mets que tu apportes est vn grand plat de creme foïetée toute en escume, & dressée en rochers sur des branches de fenoiil, ou de rosmarin. Tu fais des belles protestations, que tu veux conseruer avec grand soing l'honneur & le respect que tu dois à la Royne Mere du Roy, & à Monsieur; ce pendant on iuge sur tout par la fin  
de ton



de ton discours, qu'il n'y a point eu d'Escrivain menteur & cruel comme toy. Il est vray, que les autres ont esté plus brutaux, & nous ont attaquez en taureaux & en ours ; mais tu nous piques en serpent : ceux-là nous pouuoient casser quelque iambe ou quelque bras, mais tu portes ton venin droict au cœur.

Et pour te monstrier qu'il y a long temps que nous n'auons veu M<sup>r</sup> le Cardinal, qui dans ses refueries a accoustumé de rongner les ongles à ceux qui sont aupres de luy ; nous sommes resolu de te monstrier les nostres, & de commencer par la premiere atteinte que tu nous donnes.

Pag. 16. Apres auoir employé quinze pages en auant propos, tu dis en la seiziesme *que nous sommes bannis volontaires*. C'est, amy Cleonuille, que tu crois qu'on ne peut estre banny, si apres auoir eu le foüet & la fleur de Lis, on n'est conduict à la porte d'une Ville avec vn trompette & vn bourreau : c'est ainsi qu'on te chasseroit si on te faisoit iustice, pour auoir mesdict de la Mere, & du Frere de ton Roy : mais pour les personnes de cette condition, on les exile, lors qu'on leur oste  
la pla-



la place que la nature leur donne; qu'on les pour-  
suit avec armes, ou qu'on les emprisonne, ou en-  
uoye hors de la Cour : ce qui est vn exil pour  
ceux qui y doiuent estre en repos comme en  
leur centre, & en sûreté comme en leur maison.

Après nous auoir donné ce coup de bec en  
passant, tu te perches pour chanter les loüanges  
de Monsieur le Cardinal, & commences l'Hi-  
stoire de sa vie depuis ses estudes ( comme tu <sup>Pag. 17.</sup>  
auois faict dans ton Coup d'Estat ) redisant les <sup>18. 19.</sup>  
mesmes choses avec quelque petite diuersité; <sup>&c.</sup>  
dans laquelle nous voyons ta pauvreté, qui te  
contrainct de rapporter les misérables restes de-  
guisées d'une viande, qui nous fut présentée il y  
a tantost vn an : où nous pouuons dire que tu es  
semblable à ces Comédiens qui n'ont que qua-  
tre ou cinq acteurs, pour ioüier trente personna-  
ges, & font en vn instant des hommes & des  
femmes, avec des habits, des masques, & des  
vers.

Tu dictes, *que du temps du Marechal d'Ancre* <sup>Pag. 20.</sup>  
*sans Mr le Cardinal on eust faict encore pis: qu'il de-*  
*manda souuent son congé; mais que le besoin qu'on*  
*B auoit*

*auoit d'une teste comme la sienne, le luy fit refuser absolument .* Prends garde Cleonuille, tu accuseras le Roy d'iniustice, d'auoir chassé de sa Cour, & apres de son Royaume, vn homme qui à ton compte auoit tres-bien serui sa Maiesté, & son Estat, & qui n'estoit point coupable des maux que tu dicts auoir esté faicts en ce temps là. Tu assures qu'il diuertit le Mareschal d'Ancre de bailler Quillebeuf aux Espagnols, & que la lettre qu'il escriuit sur ce subiect fut veüe dans le procez de la Mareschale: pourquoy teniez vous cachée iusques à present cette verité? pourquoy est ce qu'on a bruslé cette piece excellente avec le procez? pourquoy est ce que les Iuges la supprimerent, si elle seruoit pour faire voir l'innocence de Mr le Cardinal? pourquoy fut il banny apres le iugement, s'il auoit rendu ce grand seruice? pourquoy n'en a on point parlé lors que la plus part des Iuges viuoient? quelqu'un de ceux qui restent peut estre s'en souuiendra? tirerez vous ce tesmoignage de la bouche du President de Bellicure, ou du Procureur General? Escriuons avec plus de verité; & disons, que iamais le  
Mareschal

Mareschal d'Ancre n'eut intention de faire ce que l'ingratitude de celuy qui auoit esté auancé par sa femme luy impose; & qu'il est plus probable qu'on descouurit quelque chose contre le Cardinal, puis que dans la suite de cet affaire on le fit sortir de Luffon, où il auoit esté renuoyé, & on le relega en Auignon.

Il faut aduoüer que tu es vn plaisant bouffon, lors que tu dicts, que le premier employ donné à Mr le Cardinal par la Mareschale fut son appren- Pag. 21.  
*tissage, & que la reconciliation apres la desroute du Pont de Sée fut son chef d'œuvre.* Tu as rencontré à ce coup, & les sages l'ont creu comme tu le dicts: il n'y a que cecy à adiouster, que la France paya bien cherement l'apprentissage de ce nouice; & que le chef d'œuvre, pour le faire passer Maistre, fut faict aux despens de beaucoup de vies & de biens. Il fut trouué si beau, qu'il en eut vn chapeau de Cardinal; & il tira de cet ouurage incomparable, le plus rare qu'il aye iamaïs faict, le nom qui luy demeurera tousiours, assauoir de Cardinal de la trahison.

Tu es mauuais Annaliste, lors que tu dicts,



*Le voila Cardinal tout aussi tost apres son chef d'œuvre: tu sçais bien qu'il y eut deux ans entre la promesse, & la promotion. On a dict ailleurs les raisons qui porterent sa Saincteté & le Roy à laisser vn peu tremper ce bonnet dans la teincture, & à luy donner le loisir de se seicher. Tu dicts avec la mesme temerité, qu'il fut chef du Conseil quelques années apres: tu sçais bien que cela ne peut estre qu'apres qu'il en a chassé la Royne sa Maistresse, & que cette qualité dans son esloignement est acquise à M<sup>r</sup> le Cardinal de la Rochefoucaut, comme estant plus ancien, encore qu'il n'en face pas ordinairement la fonction.*

Pag. 24. Tu employes sept ou huit pages pour descrire les aduantages *que la Religion & l'Estat ont retiré de la prise de la Rochelle; que tu describes comme la citadele de l'impiété, & de la rebellion.* Nous ne doutons pas que le fruit de cette prise ne soit bien grand: tu nous permettras aussi de te dire, qu'il eust esté plus aduantageux, si M<sup>r</sup> le Cardinal n'eust retenu la place, & la gloire; s'il ne faisoit fortifier celle-là, & ne gardoit avec tant de soing cette-cy; qu'il est fort à craindre que le Roy n'en

n'en ayant du tout point , ny dans tes escrits ny dans ceux de tes compagnons, il n'en aye pas davantage dans cette Ville, s'il souffre que ses rempars soient reestablis. Je confesseray pourtant, que tu aurois plus de subiect d'appeller cette prise vn chef d'œuvre, que la drollerie du Pont de Sée. Je te prie de me permettre de donner vn Aduertissement à celuy qui adresse le sien aux Prouinces; c'est de prendre garde, que dans la description des grands exploits de Mr le Cardinal, tous vous autres M<sup>rs</sup> les Escriuains l'auez tousiours nommé, estimé, & loüié tout seul, comme si personne ne l'auoit assisté. Nous voyons que dans les histoires des sieges, batailles & combats, on remarque les belles actions de ceux qui ont sagement commandé, & courageusement combattu: on les nomme pour laisser à la posterité quelque tesmoignage de leurs seruices; cela est deu à leur vertu, & en vser autrement est vn larrecin d'honneur. Mais dans vos escrits on ne faict point de mention du Roy, que par maniere d'acquit, sans parler des ordres qu'il a donné, des peines qu'il a pris, & des inuentions qu'il a trou-



ué. C'est bien dauantage, que M<sup>r</sup> le Cardinal a dict à vn homme d'aussi grande qualité que luy, qu'il auoit pris la Rochelle en despit du Roy. Ne t'estonne donc plus s'il a inuenté, que ce genereux & courtois Seigneur, que sa seule vertu a rendu prisonnier, auoit tenu ce discours, *Nous serons si fols que de prendre la Rochelle.* Quand ces paroles seroient sorties de sa bouche, les bonnes resolutions, & les executions hardies ne laissoient pas de sortir de son cœur. Contente toy que tes escrits taschent de luy desrober la reputation, comme le Maistre, qui t'employe, a faict la liberté. Nous sommes plus equitables que vous : car sans oster ce qui peut estre deu aux conseils de M<sup>r</sup> le Cardinal, & sans vouloir disputer ce qui est renuoyé aux affaires qui arriueront dans quelque temps, pour faire iuger si ses aduis ont esté salutaires, ou temeraires; nous disons qu'il faut apporter aux pieds du Roy toutes les despoüilles; & que la iustice veut, qu'apres auoir couronné sa teste de lauriers, & chargé ses mains de palmes, on en donne quelque petite branche pour le siege de la Rochelle, pour la reddition  
des

*Le Marechal de  
Bassompierre.  
Pag. 30.*



des villes rebelles, pour les affaires d'Italie, aux Mareſchaux de la Force, de Schombert, de Montmorency, de Thoiras : auxquels vous permettez qu'on adiouſte les deux pauvres prifonniers, ſi vous ne voulez qu'on leur oſte la gloire avec la liberté. Je ne dis rien de tant de ſages Mareſchaux & Maîtres de Camp, braues Capitaines, & hardis foldats, auxquels il ne faut point refuſer vn peu de noſtre ancre, pour recompenſe du ſang qu'ils ont reſpandu ; ny la vie que nos eſcrits peuuent donner à leurs noms, pour celle qu'ils ont perdu, ou par la main des ennemis dans le lieu d'honneur, ou par les maladies qui les ont tuez dans les chemins qui les y conduiſoient. Vous n'avez point loüé ny nommé iuſques à preſent que ce grand Cardinal, qui ayme toutes choſes grandes comme Senecio : vous le rendez auteur de tous les biens, & le logez par deſſus Dieu, en ce que vous le faiâtes operer ſans cauſes ſecondes : on diâ de luy, comme de Menetho, qu'il faiâ tout, tout ſeul : mais comme ce Grec, qui luy voyoit faire pluſieurs charges de la republique, predict apres en

auoir

auoir faict le denombrement, qu'il auoit trouué beaucoup de moyens pour chercher le repentir; nous croyons aussi que Monsieur le Cardinal n'en est pas esloigné.

Nous ne parlerons pas icy des fautes qu'il a faict dans tous les rencontres desquels il tire tant de gloire, ny de la temerité de ses conseils, de ses interests particuliers, de ses querelles & vengeances: tout cela a esté remarqué ailleurs; & nous ne voulons pas vser de redictes, comme tu faicts, ny rendre nos pages petites comme les tiennes: en quoy tu monstres que tu es vn Ad-uocat corrompu, en faisant beaucoup de roolles, pour auoir vn plus grand payement.

Pag. 35. Vous ioüiez vne piece nouuelle, lors que vous dictes, *que la Royne Mere du Roy, ayant esté d'aduis d'assister Monsieur de Mantoüe, deuint Espagnole par les persuasions du Cardinal de Berulle, & du Garde des Sceaux de Marillac, durant le voyage que le Roy fit à Suze.* Vous ne donnez point de marques de ce changement, & nous en auons du contraire: elle assista l'année suiuiante au Conseil, qui fut tenu pour resoudre le

le second secours; elle l'approuua, & que Monsieur le Cardinal eut la charge de le conduire, en mesnageant l'affection de Monsieur de Sa- uoye : avec lequel son imprudence, sa vanité, & sa vengeance, le firent rompre; ce que la Royne, ny pas vn esprit sage ne pouuoit trouuer bon; non plus qu'on ne sçauroit aduoïer, que les deux personnes qu'on veut faire passer pour affection- nées à l'Espagne au preiudice de la France, ayent trahy leur pays, & fuiui les anciennes maximes de la Ligue : ce qui rendroit tref-coul- pable le Cardinal, qui s'est vanté de les auoir aduancez, ayant sceu le parti qu'ils auoient tenu durant les troubles du Royaume, & le zele qu'ils auoient tesmoigné, qui estoit changé en vne parfaicte affection pour la Religion, le Roy, & l'Estat; ayant tousiours creu, comme font tous les gens de bien, que ces trois choses estoient in- separables.

Comme il n'appartient qu'à Monsieur le Car- dinal de faire des loix, lors qu'elles luy sont fauo- rables; & de les rompre, lors qu'un dessein nou- uveau les a renduës contraires : aussi luy seul peut

C

impu-



impunement presenter des hommes au Roy, luy dire qu'ils sont les plus vertueux de son Royaume, & les plus fideles à son Estat; iusques à ce qu'ils s'opposent à ses mauuaises volonte. C'est pour lors que non seulement il leur impose des crimes nouveaux, mais qu'il se desdict sans honte de tout ce qu'il auoit dict auparauant; se blasme de temerité en ses choisis, & ayme mieus se rendre infame pour auoir ietté dans les affaires d'Estat ceux qu'il appelle meschans, que de se voir en danger d'en sortir, estant descouuert par ceux, auxquels il a procuré quelque employ; plustost pour les rendre ministres de ses mauuaises intentions, & se descharger sur eux de la hayne de ses violences: (à quoy vn homme de bien ne scauroit consentir) que pour leur faire part des bonnes graces du Roy, & de la gloire qu'on peut acquerir en le seruant avec affection & fidelité.

Pag. 37. Apres auoir apporté, pour la premiere cause de l'auersion contre le Cardinal, les conseils d'un mort, & d'un prisonnier, qui ne se deffendent que deuant Dieu; tu as voulu reietter le desespoir de l'Exempt ~~Baranton~~, sur la grande haine que

que la Royne auoit conceu contre Monsieur de Mantoüe , pour lors M<sup>r</sup> de Neuers . Toute la France ſçait , que le malin eſprit porta le foible de cet Exempt ( qui fut deſaduouié des deux coſtez ) à ſe deffaire ſoy meſme ; & la Royne fut tres marrie que ce forcené euſt adiouſté la perte de ſon corps, & de ſon ame, à celle de ſon honneur.

La ſeconde cauſe de la mauuaiſe volonté que la Royne conceut contre le Cardinal, n'eſt pas ſelon voſtre aduiſ ( car vous ne le croyez point ) mais eſt ſelon voſtre diſcours, le deſſein du Mariage de la Princeſſe de Florence , auquel elle creut que le Cardinal ſ'oppoſoit avec les Miniſtres de Monsieur, pour aduancer celui de la Princeſſe de Mantoüe . Tu dictſ *que cette imagination achemina de le perdre*. Il faut confeſſer que tu trauailles ſur des mauuais memoires . Si ce qu'on te faiçt eſcrire eſtoit vray, la Royne euſt dès ce temps là chaffé de ſa maiſon le Cardinal, & les ſiens : il n'y auoit point de conſideration, qui l'en peuſt empescher. On te dira bien d'auantage, que le Roy eſtoit plus diſpoſé à l'abandonner qu'il n'a eſté apres : il ne faut pas douter que

Pag. 38.  
& 39.



la creance de la Royne estant plus grande, & la puissance du Cardinal moindre, il n'eust esté plus aisé de le ruiner, qu'il n'a esté du depuis. Par où tu peux iuger que les raisons, qui ont porté la Royne à l'esloigner de ses bonnes graces, & à parler comme elle fit au Roy, ont esté tirées de la mauuaise conduicte, & pernicieux desseins que le Cardinal a faict paroistre d'un an apres, ayant tref-mal mesnagé la santé, les affaires, les Alliez, & les Finances de son Maistre; & sur tout, les biens & les bienfaicts de sa Maistresse: outre qu'il a pris, à la veüe de tout le Royaume, les marques d'un vsurpateur ou d'un dissipateur de l'Estat. Et parce que nous auons apporté ailleurs toutes ces raisons, & que la France iuge mieux par ce qu'elle void & qu'elle ressent, que par ce que nous pouuons dire & escrire; nous te renuoyons à nos autres escrits, & à la cognoissance publique, pour te dire que tu as tort, en parlant de la Royne, d'employer ces termes : *Les exemples du passé nous apprennent ce que peut ordinairement sur l'esprit irrité d'une femme, & d'une femme de cette marque : la violence de ses mouuemens irreguliers,*  
*qui*



qui iettent par fois la raison des plus sages hors de son accoustumée assiette. Tout beau, Cleonuille, tout beau; tu t'eschauffes vn peu trop pour vn Auuergnat. Le temperament que tu veux apporter en la page 41. disant *que la Royne n'est pas* Pag. 41. *vindicative*, est vn foible remede à ce destraquement de cerueau, que tu veux persuader estre arriué, & à cette *possession des malins esprits*, Pag. 42. que tu dicts *s'estre meslez dans les humeurs de la Royne*, apres luy auoir donné les deux mauuaises qualitez qu'on peut tirer de ce discours: quel deguisement que tu puisses apporter, tu ne sçaurois adoucir l'iniure que tu dicts, ny excuser ta folie, ny couvrir la rage de celuy qui t'employe.

Tu te mets fort en peine pour rechercher les exemples des Princesses qui ont esté choleres: Pag. 40. nous iugerions plus rares ceux des Dames qui ont esté exemptes de cette imperfection. La parole de Dieu nous enseigne, *qu'il n'y a point d'indignation plus grande que celle de la femme*; Eccli. 25. & vn gentil Poëte Romain a dict, que son infirmité la porte à se plaie à la vengeance. Lucan. Nempes pusilli

*Semper & infirmi est animi exiguique voluptas Vltio: continuo sic collige, quod vindi- dicta Nemo magis gaudet quam femina.* —

Pag. 43. Tu nous representes vne grande cabale, que tu appelles amas de *broussailles & ordures au dessus d'une escluse*, qui est à la fin emportée par l'impetuosité de l'eau arrestée par tant de bois trauesez. Tu te fers en cet endroit du mesme discours presque mot à mot que tu as faict dans ton Coup d'Estat : c'est vn tesmoignage de la disette de tes pensées, & que tu es contrainct d'estre larron à toy mesme : c'est aussi vn argument que tu veux remplir ton liure, & le rendre de la grandeur de l'autre, pour payer tous les ans par vn ouurage de mesme poids, que tu presentes à la fin de l'année pour retirer l'ordonnance de ta pension : de sorte, que si tu dicts *que nous appellons desordre dans l'Estat tout ce qui ne va pas bien dans nostre maison*; nous te pouuons repartir, que ce qui faict bien aller la tienne, est par toy nommé excellente conduicte du public. Nous ne sommes pas marris qu'on te face du bien, mais de ce que tu le cherches au preiudice de ta reputation, & de ta conscience, ne pouuant dire autre chose de toy; si ce n'est que tu es sottement trompé avec les plus innocens du petit peuple,

ou



ou que tu es du nombre des trompeurs corrompus. Si tu es des premiers, tu es digne de la compassion des honnestes gens, & du salaire de ceux qui t'employent : si tu es entre les seconds, tu merites plustost chastiment que recompense.

Tu nous veux faire passer pour miracle de Pag. 45.  
 S. Martin ce qui arriua le iour de sa feste, comme si ce bon Sainct estoit le protecteur du Cardinal, *parce qu'il l'est de la France*: tu deuois adiouster, parce que ce bon Seigneur a son Abbaye de Marmoustier, & son Doyenné de Tours. Je ne trouue point de personnes qui facent meilleur marché des miracles que font les escriuains du Cardinal; ny d'homme qui les attire, & qui y croye moins, que faict le Cardinal. Cet infame bouffon, qui a donné le nom à la journée des duppes, ne s'est pas aduisé de dire que ce bon Sainct couurit le Cardinal avec le reste de son manteau, afin qu'il fust habillé de la mesme liurée qu'il auoit donné au diable, lors qu'il le prenoit pour vn goeu.

A quoy sert, ie te prie, pour faire paroistre Pag. 46.  
 beaucoup de besoigne à ton Maistre, la descri- ad 53.  
 ption



ption curieuse que tu fais dans six ou sept pages du naturel & de l'éducation de Monsieur ? Tu representes à vn Prince, qui a des enfans, ce qu'on luy a dict estant petit enfant : tout cela est hors de propos pour les affaires du temps ; non pour les tiennes, comme j'ay dict.

Pag. 52. Pourquoi, escriuant contre la Royne Mere du Roy, blasmes tu le conseil de ses ennemis, qui mirent le Colonel aupres de Monsieur ? Pourquoi entres tu dans les tombeaux de deux Mareschaux de France, pere & fils, & du grand pere genereux Capitaine, pour leurs casser les os, & te rendre semblable à d'Aubigny, qui a esté le seul avec toy qui a mesdict de ces deux fideles seruiteurs de nos Roys ? Si tu trouues vne chose à reprendre dans leur vie, cela ne rendra pas innocent celuy que tu soustiens, qui est accusé d'en auoir fait dix mille mauuaises.

Pag. 53. Lors que tu dicts, *qu'un Ecclesiastique estrange auoit esmeu le venin du Colonel*, tu as designé l'Abbé l'Escaille ; qu'on deuroit traicter plus doucement apres la paix faite avec son Maistre, & la reconciliation avec luy. Nous voyons bien  
que

que l'orgueil du Cardinal est si grand, que l'affection de tous les Princes du monde luy estant indifferente, il choque amis & ennemis: comme il faict le Prince de Piedmont dans sa puante Satyre, & la memoire du feu Duc de Sauoye son Pere dans ses lettres de Duc & Pair. Mais il faut croire, qu'apres le mespris de la Royne sa Maistresse, & Mere de son Roy, & du Frere vnique de sa Maiesté, rien ne luy est sainct & sacré; & on ne doit point trouuer extraordinaire s'il perd le respect avec les Princes estrangers, puis qu'il veut vser de ces termes, *que Monsieur auoit iuré* Pag. 55.  
*amitié avec luy.* Certes il faut qu'il passe, ou pour vn tres-mauuais courtisan, ou pour vn homme res-orgueilleux: nous le cognoissons, & sommes assurez que sa conscience luy fera plustost con-  
 fesser vn crime, que sa vanité ne luy fera ad-  
 uoier vne sottise.

Tu apportes des beaux exemples, pour prou- Pag. 57.  
 uer qu'il faut mettre Monsieur en tutele: tu dicts,  
*un Roy a faict tuer un Secretaire de son Frere*  
*naturel, parce qu'il guindoit l'esprit de son Maistre*  
*choses trop hautes.* C'est à dire, que tu voudrois

D

qu'un



qu'un Roy fust meurtrier, & qu'il traictast comme un bastard son Frere legitime. Si Monsieur deffioit de ce que tu conseilles, & si ses seruiteurs craignoient l'assassinat duquel il semble que tu es d'aduis; par ta foy aurois tu trouué le chemin de la paix? ne vois tu pas, que celuy qui t'employe a intention de porter les choses au desespoir; lorsqu'il approuue ce que tu escripts, apres ce que nous sçauons qu'il a dict?

Pag. 58. Pour l'exemple de remuë-mesnage que fit Charles Quint dans la maison de Ferdinand son Frere; nous te respondons, que les seueritez qui sont sagessees en Espagne, seroient des cruautez en France: les esprits de nos Princes ne le souffriroient pas; & les extremitez dans lesquelles on les porteroit, causeroient des plus grands maux, que ne peuuent faire leurs petits desplaisirs, qui sont plus facilement appeisez qu'ils ne sont esmeus; sur tout, quand on ne represente point aux Roys (comme tu fais) qu'ils peuuent tuer leurs Freres, leur oster tous leurs seruiteurs, & faire massacrer ceux auxquels ils sont confient.



Tu n'as eu garde de dire, en parlant du changement que fit \* Ximenes dans la maison de Ferdinand, que l'auteur que tu as cité dict, que ce Prince n'estoit qu'un enfant; auquel tu compares un Fils de France qui a des enfans. Ce mesme Historien dict, que Ximenes osta des gens de bien à Ferdinand par vengeance & inimitié qu'il auoit contre Nonius Gusman, Cauallier tres-generoux & tres-sage; parce qu'il auoit eu la grande Maistrise d'Orete sans s'estre adressé à luy: ce qui estoit un crime en ce temps là, comme en cestui-cy c'est un moyen de ne rien obtenir, de ne dire pas au Cardinal qu'on veut tenir le bienfaict de luy seul. Pour Aluare Oforius, qui estoit Precepteur de Ferdinand, il estoit en horreur à Ximenes Cordelier, parce qu'il estoit Dominicain, & qu'il y auoit une grande ialousie entre ces deux Ordres. J'apporte les raisons de ton Historien, qui adioust que Ferdinand, quoy qu'enfant, voulut tuer Ximenes, qui estoit sur la fin de ses iours fou, furieux & empoisonné. Il fut en execution à tout le monde, pour auoir ruiné la fortune de beaucoup de gens de bien; & sur

\* Aluarius  
Gomes  
lib. 7.

*Hæc omnia, quantum ad*

*fidem & integri-*

*tatem Petri Non-*

*nij & Oforij*

*pertinet, vana*

*fuisse, & ab eorum*

*emulis in vulgus*

*sparsa, multis*

*argumē-*

*tis com-*

*pertum habeo:*

*Nonnius enim ob*

*mores in-*

*culpato, & insignē*

*pietatem, ab Isa-*

*bella Regina puer-*

*ritia Ferdinandi*

D 2

tout,

*datus est*  
*custos;*

*Oforius* tout, d'un ieune Gentilhomme, nommé Mosco-  
*verò, et si* fus, qui estoit le plus adroict d'esprit & de corps,  
*nō admo-* & le plus parfaict en toute sorte d'exercices,  
*dum se-* qui fust en Espagne: & afin que tu ne m'accu-  
*dati inge-* se pas d'estre imposteur, comme toy, i'ay mis à  
*ny fuit,* la marge vne partie de ce que ton autheur en  
*animi ta-* a dict.  
*men in*  
*Reges fi-*  
*delissimi*  
*habitus.*

Pag.60.

Tu parles de trois Officiers de Monsieur: & tu dicts, *On les taste, on les esbranle, on les emporte.* C'est vne belle loüange que tu donnes à ceux qui ont entrepris ce trafic, dans lequel nous voyons bien, par vostre confession, qu'on a voulu achepter des seruiteurs, pour les porter à vendre leur crédit: mais nous ne voyons pas que ce marché vous aye reussi, ny qu'ils vous ayent liuré leur Maistre, & leur conscience. Vous ne seriez pas en cholere contre eux s'ils l'auoient faict: & le seul subiect de vostre indignation vient de ce que leur fidelité a esté plus forte que vostre corruption; que leur esprit a veu qu'elle tendoit à les porter à endormir leur Maistre, ce pendant que vous pilleriez la maison, dans laquelle il est né; & dissiperiez le Royaume, à la conseruation duquel  
 il a



il a le premier interest apres celuy du Roy. Cela vous a tellement faschez , que sur l'exemple des seruiteurs d'un fils de putain vous voulez qu'on tuë les chiens , que vous n'avez sceu enchanter , & qui ont esueillé leur maistre , lors qu'on le vouloit ou enleuer ou egorger : vous le conseillez, en proposant qu'un Roy peut faire, sans forme de iustice, contre son Frere, ce qu'un autre a faict contre son Fils.

Vous venez à la promesse du chapeau de Cardinal faicte au President le Coigneux, & nous Pag. 61.  
& 62. contraindez de dire : O sainte Pourpre, à quoy es tu reduicte en ce temps, depuis que tu as esté la recompense d'une trahison! celuy qui l'a faicte, confesse qu'il t'a présenté pour en attirer d'autres. Il est vray qu'on auoit promis l'eschange d'un mortier en un bonnet rouge; mais ce chaperon n'a pas aueuglé un oyseau clair voyant. Sa Sainteté n'a point refusé l'escarlata de Rome à celuy qui estoit content d'auoir celle du Palais: les refus qu'on feint, sont imaginaires; & les mauuaises mœurs n'ont pas empesché cet honneur, qu'elles firent differer de deux ans à celuy qui s'en



est plus rendu indigne depuis qu'il l'a receu : il sçait ce qui fut recité en plein Consistoire , & la peine qu'on eut d'effacer les impressions qu'on auoit donné contre luy : celles qu'on allegue contre le President sont ridicules. Vn Roy de France peut aussi bien surmonter les difficultez de Rome, qu'un Roy d'Espagne : mais c'est en vain que nous contestons d'une chose qui a esté proposée par des fourbes, & qui n'a iamais esté au point où ils desirent de faire croire qu'elle a esté.

Pag. 64.

I'ay remarqué dans toute la suite de ton discours, que tu fais estât d'apporter plus d'exemples que de raisons. Ceux-là te sont plus aysez; parce que trois ou quatre liures que tu as leu, t'en fournissent assez : entre autres celuy de Iean Duc de Bourgongne , le flambeau fatal de la France, auquel tu compares Monsieur; ne te souuenant pas que le Frere unique du Roy, ne peut rien auoir de semblable avec le meurtrier d'un Frere unique d'un Roy; & que ceux que tu appelles seruiteurs du Bourguignon n'estoient point ses domestiques, mais des François traistres à leur

Prin-

Prince, que l'ambition, la vengeance, & les artifices du Duc auoient desbauchez . Tu adioustes Pag. 67. que Louys XI. & le Duc d'Alençon, ne s'estoient retirez, l'un de la Cour de Charles VII. son Pere; & l'autre de celle de Henry III. son Frere, que par les mauuais conseils, & pour les interests de leurs seruiteurs. Je te diray, que ce qui se passe n'a rien de pareil avec les Histoires que tu recherches. Nous confessons, que ces Princes n'auoient point subiect de se plaindre ny d'apprehender, comme a Monsieur . Il n'y auoit point en ce temps là de Ministre si puissant, insolent, & violent, comme est le Cardinal; ny point de Royne Mere du Roy, sage & vertueuse, emprisonnée; des trente places fortes & frontieres entre les mains d'un homme, avec les plus importantes Prouinces; vn Conseil composé à sa mode, toutes les grandes charges de l'Estat dans ses mains, toutes les Finances du Royaume dans ses coffres, dix mille soldats entretenus dans ses garnisons, trois cens pieces de canon qui ne portent point d'autres armoiries que les siennes, soixante vaisseaux qui ne recognoissent point d'autre Maistre

que

que luy, trois cens prisonniers qui sont gardez par  
 ses Capitaines & concierges, deux Mareschaux de  
 France qui sont captifs sans crime, vn autre qu'on  
 a faict mourir en prison avec vn Frere naturel du  
 Roy ; plus de cinq cens personnes de qualité,  
 hommes & femmes, bannis, proscripts, & des-  
 poiilleez de leurs biens sans forme de Iustice: tout  
 cela & beaucoup d'autres choses que chacun  
 scait, & plusieurs ressentent, ne sont pas, à ton ad-  
 uis, des subiects capables de faire qu'un Frere uni-  
 que d'un Roy, qui n'a point d'enfans, apprehende  
 pour sa personne, & pour l'Estat, les desseins de  
 celuy qui a toutes les marques d'un vsurpateur,  
 qui menace effrontement de l'exclusion de Char-  
 les de Lorraine, celuy que nous tenons pour Dau-  
 phin, iusques à ce qu'il aye pleu à Dieu d'en don-  
 ner vn à nostre Roy. Feuillete tant que tu vou-  
 dras nos Histoires, & adioustes ( comme tu fais  
 d'ordinaire ) quelque chose du tien pour mieux  
 accommoder les choses passées à celle de ce temps,  
 ie te deffie de trouuer rien de semblable.

Pag. 68.     Parmy beaucoup de reproches que ie te faicts  
 avec raison, ie crois estre obligé de te faire vn re-  
 merciment



merciment d'un bon avertis que tu donnes aux serveurs de Monsieur, lors que tu dictes *que le desir de se faire quelque chose plus qu'ils ne sont, est le seul but de toute l'équipée qu'ils ont fait faire à leur Maître; Et que le temps, qui ne laisse rien de caché, découvrir ce que tu dictes.* Tu auras prophétisé, si l'intérêt de ces Messieurs est la règle d'un accommodement; il n'y a point de doute que ce ne soit la pierre de touche de leur fidélité: mais aussi s'ils font voir, qu'ils ne desirent autre chose que la gloire de Dieu, l'honneur du Roy, le repos de la Royne Mere, la réputation de Monsieur, la sûreté de l'Estat, la delivrance des prisonniers, le rétablissement des bannis, & sur tout le soulagement du pauvre peuple, comme ils doivent faire, & l'ont ainsi juré; Cleonille sera bien trompé, & reconnaitra, peut estre à ses despens, qu'il ne faut pas juger témérairement des intentions des grands Princes, ny de celles des personnes de qualité, qui sont en considération auprès d'eux.

Après avoir fait paroître que tu es malicieux, Pag. 69.  
tu passes pour bouffon, lors que tu nous représentes les desseins que Monsieur avoit à Orleans

E

com-

comme tres-aduantageux à l'Estat : tu luy fais faire des puissantes leuées de gens de guerre en Limosin, des grāds amas de prouisions en Beaufse, desbaucher en vn instant avec ces deux Provinces, la Prouence, le Dauphiné, & la Bourgonne, resusciter le vieux Royaume d'Orleans, reduict en cendres depuis tant de siecles : bref tu fais desia paroistre ce Prince deuant Corbeil & Pontoise, avec trente mille hommes sur le point d'affamer & assieger Paris. Voila d'estranges visions : sans faute ce sont les mesmes que le Cardinal ne croit pas ; & qu'il presente au Roy, pour luy donner auersion de ses plus proches : on te faiet porter cette fausse marchandise dans le public, & on se persuade qu'elle est bonne, pourueu qu'on l'achepte sur le Pont neuf, où se faiet le debit de toutes les drogues des charlatans de France, qui sont aussi fidelement composées que tes escrits.

Pag. 71. Tu as voulu traicter Monsieur & ses seruiteurs les premiers, & apres les auoir bien testonnez, selon ton aduis, tu viens pour lauer la teste à la Royne Mere du Roy : tu dicts *que la plus part des choses*



*ses du monde sont semblables aux tableaux à deux rapports.* Il n'y a rien de plus veritable: mais tu te mets du costé qui te faict voir le pourtraiçt d'une tres-belle vie comme fort hideux; tu le veux représenter à ceux qui le considerent à main droite, tel qu'il te paroist à la gauche, où tu es avec le Cardinal, & avec les lunettes de quelque pension, qui n'est iamaïs sans passion: mais ceux qui n'ont ny pension ny passion, se moquent bien de toy. Pour moy, qui approuue tout ce qui est sagement Pag. 73. escrit; ie te confesse que le long discours que tu as 74. 75. & 76. faict, pour monstrier que les Roys doiuent plus à leur Estat qu'à leurs plus proches, peut estre receu. Je suis d'accord avec toy d'une partie de ce que tu en dict; mais tu me permettras aussi de me seruir de la mesme sincerité pour te reprendre des mauuaises inductions que tu fais, & des furieuses consequences que tu tires d'une seule proposition, qui est tousiours la generale, que tu tasches de prouuer par vne grande quantité d'exemples: mais pour la proposition particuliere, à la confirmation de laquelle ton discours se deuroit principalement arrester, nous ne voyons



rien qui nous puisse, ie ne dicts pas conuaincre, mais instruire. Et afin que ie m'explique plus clairement; parce que ie recognois bien en ta façon d'escrire, que tu es discoureur sans Dialectique; ie te dicts, que c'est en vain que tu te tourmentes de nous prouuer, qu'un Roy doit auoir plus de soing de conseruer son Estat, que de contenter sa Mere & son Frere, si tu ne monstres en quoy la Mere & le Frere, contre lesquelles tu es crits, ont voulu ruiner cet Estat. C'est aussi vne grande folie d'aller chercher dans les liures tous les lieux communs, & exemples des mauuaises Meres des Roys, & de leurs mauuais Freres, si tu ne fais voir en quoy la Mere & le Frere, que tu veux accuser, ont esté semblables à celles ou à ceux avec lesquels tu les compares. C'est vn erreur qui vous tient, & que vous desirez de ietter dans le public, que la Royne Mere du Roy est criminele, & a failli contre l'Estat, sans sçauoir & dire, ny quand, ny comment. Il est certain, que si elle n'eust iamais esloigné de sa maison le Cardinal & les siens, & si elle n'eust point decouvert à sa Maiesté les pernicieux desseins de cet hom-

hōme, elle estoit tres-fidele au Roy & au Royau-  
me : comme si le Marechal de Marillac (qu'on  
a recognu innocent) n'eust eu vn frere, auquel on  
ostoit les Seaux, il estoit le meilleur & le mieux  
employé seruiteur qu'eust le Roy : de sorte que  
les crimes que vous imposez, sont crimes qui sont  
faicts par les occasions, non par les personnes. Re-  
marquez en la Royne vn peché contre le Roy, &  
son Estat ; produisez ses escrits, faictes le proces à  
ses Secretaires, & à ceux qui ont traicté pour elle  
auec les ennemis de la France, car elle ne peut  
auoir negocié toute seule; alleguez quelque chose  
pour donner couleur à vos violences. Vous ne  
dictes autre chose, que la Royne Catherine de  
Medicis, Anne de Bretagne, Louyse de Sauoye,  
Elisabeth de Bauiere, Iudith de la seconde race,  
Isabeau de France femme d'Edoüard II. Roy  
d'Angleterre, Vrraque Royne de Castille, firent,  
dirent, furent traictées, chassées, emprisonnées: en-  
core marquez vous ou quelque faute, ou quelque  
soupçon en celles-là; & lors que vous ne trouuez  
pas ce que vous cherchez dans les Histoires, vous  
auez l'esprit & la malice de l'adiouster: mais pour



ce qui regarde la Royne Mere du Roy, vous ne dictes pas le mal qu'elle a fait, & voulez montrer par les exemples des Princesses crimineles, ou que vous croyez estre telles, que celle qui n'est point semblable en leur peché ou vray ou pretendu, doit porter leur deshonneur ou leur peine. Vous n'escrivez que pour tromper le peuple, & amuser les fots & ignorans curieux par les Histoires, qu'ils trouvent ramassées dans vos escrits; sans prendre la peine d'aller aux sources, que vous n'avez iamaïs veu, ny sans iuger si elles sont bien appliquées, ny si vous avez bien prouvé ce que les exemples ne sçauroient faire, n'estans pas argumens (comme les idiots s'imaginent) que contre ceux qui les ont produicts; & contre les autres sont embellissemens de ce qui a esté confirmé par viues raisons, ou faits bien auerez.

Mais vous dictes que la Royne a attenté contre l'Estat, ayant entrepris de s'opposer à ce grand Cardinal par lequel il subsiste, & n'ayant pas esté en bonne intelligence avec luy. A la verité c'est le seul crime que vous avez marqué distinctement en vostre premiere Declaration, c'est le seul  
fait



faict particulier que vous avez allegué; car pour tous les autres, nous vous auons coniuré d'en dire quelqu'un: nous auons voulu prendre le chemin de la Iustice, pour vous obliger de recriminer contre nous, lors que nous vous auons accusé d'entreprise contre l'Estat: apres tout cela nous n'entendons que ces paroles, *Elle a faict des menées, elle a eu des intelligences*. & en suite de cette belle production on remplit le sac des fautes de toutes les mauuaises Meres. Les Cardinaux ne sont pas si anciens au monde comme les Meres, & les Roynes: pourtant si le respect que nous portons à cette grande Dignité, qui est deshonorée par le Cardinal de Richelieu, ne nous retenoit, nous luy ferions voir, & à vous monsieur le rauaudeur d'exemples, que nous en sçauons beaucoup: mais ses fautes estant publiques & horribles, il ne faut point aller chercher dans les liures les moyens de les faire cognoistre, ny de les rendre plus hideuses: nous confessons aussi nostre ignorance, que ny dans son ordre, ny dans toutes les Histoires des plus violens & des plus ingrats hommes qui ont iamais vescu, nous ne trouuons  
rien

rien qui puisse représenter sa violence, & son ingratitude.

Canta-  
cuzenus  
lib. 3.

I'ay bien leu quelque chose d'approchant dans vn bon Autheur, d'vn nommé Apocaucus. Cet homme estoit d'vn naturel fort ambitieux, & grandement corrompu, faisant sur tout profession de cette infame tromperie, à laquelle on a donné depuis quelques années le nom de fourberie. Il porta ses desseins iusques sur le thrône de l'Empire d'Orient, & commença ses poursuites par la ruine d'Anne Mere de Iean Empereur; la descria parmy le peuple, & par des lettres supposées, comme si elle eust voulu changer la Religion, l'ayant par ces detestables artifices renduë execrable mesmes à son Fils, qui receut trop facilement les impressions que ce mauuais seruiteur, aduancé par sa Mere, luy voulut donner. Apres qu'il l'eut ruinée dans son esprit; mais non pas emprisonnée, ny chassée, il gouuerna si paisiblement son Maistre, qu'il eut de luy les principales charges de l'Empire: il fut Admiral, & Colonel des gensdarmes; ou, comme quelques vns disent, Connestable: il pillà tous les thresors publics, & les

& les cacha dans deux chasteaux, l'un desquels s'appelloit Epibas, & l'autre Mangas. Pour se rendre tous les Grands fauorables, il leur faisoit esperer le mariage de sa fille vnique, & ne la donnoit à personne. Sa puissance deuenuë insolente, & ne pouuant estre supportée long temps, les principaux Officiers commencerent à s'y opposer, & luy à disposer l'esprit de l'Empereur à les faire emprisonner en si grand nombre, que le Palais, appellé le Grand Iustinian, en fut tout rempli: ne trouuant point de moyen pour les faire mourir, & n'ayant aucune preuue des crimes qu'il leur auoit imposez, il auoit à sa deuotion vn pendent, nommé Glycas, homme lay, lequel prenant vn habit de Moine s'en alloit à la prison pour entendre les confessions de ces pauvres malheureux, pour descouurir s'ils auoiēt cognoissance de quelque conspiration contre luy. Mais comme l'innocence, quel artifice qu'on puisse apporter, ne se veut iamais declarer criminele; Glycas ne pouuant rien tirer des prisonniers, Apocaucus se resolut de les aller voir pour les menacer: & par vn iuste iugement de Dieu, qui aueugle ceux qu'il

F

veut



veut perdre, ayant laissé à la porte ses gardes, qui estoient aussi fortes que celles de l'Empereur, il entra sans apprehension: mais il fut aussi tost assailli par tous ceux qu'il auoit rendu misérables; lesquels se ruants sur les marteaux de quelques massons qui bastissoient, sacrifierent ce scelerat à leur vengeance, & à la Justice de Dieu. Que dicts tu de cette histoire, Cleonuille? Je m'assure que celuy, pour lequel tu escripts, n'oseroit entreprendre de se trouuer sans escorte dans la Bastille, au milieu de quatre-vingts & dix prisonniers qu'il y a mis; il craindroit que sa fin ne fust semblable à celle de cet homme, duquel il a imité les actions en sa vie.

Je t'ay voulu donner ce petit exemple pour échange de tous ceux que tu as apporté: il n'y a que cette difference, que cettui-cy a faict voir, qu'une partie des crimes publics du Cardinal s'est rencontrée dans la vie d'Apocaucus; mais ceux que tu apportes des mauuaises femmes ne monstrent rien, que l'infirmité de leur sexe en general, ou la malice particuliere de celles qui ont esté coupables. Tu as parlé, apres des Montagnes, d'Olym-

d'Olympia; c'est à dire, d'une adúltere; & pour auoir subiect de comparer le Roy à Alexandre : regarde, à qui tu compares sa vertueuse Mere.

Tu vas sur les brisées de ce venerable authœur, Pag. 74.  
 auquel tu as desrobé beaucoup de choses : mais c'est que tu as eu honte de les voir si mal vestuës, que tu as eu enuie de les habiller vn peu plus honnestement. Tu reproches à la Royne ses grands biens : nous auons respondu a cet article; auquel adioustons, que la Royne ayant apporté en France la moitié plus que les autres Roynes, ayant espousé Fille vn Roy de cinquante ans, elle a eu quelques aduantages, outre ceux que la naissance du Roy, & la conseruation de l'Estat durant la Regence, luy ont acquis. De son espargne, & avec l'ayde du Roy, elle a faict bastir le beau Palais de Luxembourg, que tu monstres comme le tesmoignage d'une felicité qu'elle n'a pas cognuë; mais c'est vn present pour le Roy, & vn monument à la posterité de la grandeur d'une Princesse sortie de la maison magnifique de Florence. Le Cardinal a faict vn bastiment à Richelieu, qui a autant cousté avec ses despendances, que



Luxembourg avec son petit clos : celui-là a esté dresé, orné, & accompagné de belles terres acquises par le sang du peuple, & il n'en reuiet rien au Roy; ce que tu ne trouues pas mauuais, parce que tu n'es pas payé pour cela, comme pour faire paroistre laid tout ce que la Royne a faict de beau.

Pag. 75.

Tu as encore plus grand tort de luy reprocher les bienfaicts du Roy; comme s'il les pouuoit mieux loger que dans le cœur qui luy a donné la vie : tu aurois plus de subiect de dire, que sa Maiesté ignore qu'on aye retenu sans forme de Iustice & sans crime, non seulement les gratifications que la Royne sa Mere receuoit, mais les reuenus de sa dot & de son doüaire, qui sont choses sainctes & sacrées, qui ne peuent estre rauies que par la mort, ou par vne condamnation infame. Les enfans doiuent l'entretien de la vie à ceux desquels Dieu a tiré la leur : les Roys sont hommes, ils viennent au monde comme les autres, & il n'y a point de Dignité qui les exempté de rendre les deuoirs naturels. Le Roy peut croire que la Royne sa Mere est priuée de  
ses



ses bienfaicts, mais il ignore qu'elle soit despoüillée du bien qu'elle auoit deuant que le feu Roy fust son mary, & sa Maiesté son enfant. Il semble que ces belles qualitez d'Espouse & de Mere des Roys luy doiuent plustost augmenter que diminuer ses rentes ; & qu'il est fort scandaleux, qu'un seruiteur qui en a adiousté de si grandes aux petites de sa maison, par la liberalité de sa Maistresse, luy rauisse ce que la naissance luy a donné, & face tout d'un coup tarir la fontaine, dans laquelle il a puisé vne bonne partie de ce qu'il possède, pour rendre, s'il pouuoit, la plus pauvre Dame de France, celle qui l'a fait le plus riche Prelat de l'Europe.

Après ce discours vient ta digression, dans laquelle tu t'efforces de monstrier, qu'il faut preferer le salut du public, non seulement aux contentemens, mais au salut des siens : tu te fers de ce meschant exemple que des Montagnes auoit apporté : ie ne sçay pas ce que tu veux inferer des seueritez & cruautez que tu allegues, & que ie n'ose point redire. Je t'aduertis seulement, que tu es obligé de conuaincre ceux auxquels tu imposes des crimes, qui approchent de ceux qui

Pag. 78.  
& 79.

ont esté chastiez par des confiderations de Religion & d'Estat , capables d'etouffer la nature. Nous t'assurons au contraire , que ceux qui la veulent faire perir par les loix de la Religion & de l'Estat, sacrifient des innocens à la ruine de l'vne & de l'autre,dequoy ils sont conuaincus par leurs actions publiques; là où ceux que tu calomnies n'en peuuent estre iustement soupçonnez,pour les plus secretes qu'ils ayent iamais faict.

Pag.80.

Tu es en belle humeur,lors que tu cherches les raisons pourquoy les biches ne portent point de bois : en quoy tu monstres ton imprudence d'auoir mesdict du sexe puissant en France,sur tout à Paris ; & mesmes,à ce qu'on dict, aupres de celuy qui t'employe . La raillerie de Louys XII. estoit vn peu desaduantageuse aux Dames : mais elle ne touchoit pas dauantage la Royne sa femme,que les autres.

Ie ne te repartiray rien sur le massacre de Blois, que tu dicts auoir esté caché à la Royne Catherine: ie croy qu'on a satisfait sur cet article en la Responce au Sieur des Montagnes, duquel tu as tiré vne mauuaise consequence : laquelle estant  
ambi-

ambiguë, & fort embarrassée, ie mettray icy tes Pag. 81.  
 paroles, pour t'obliger à t'expliquer: *La dernière*  
*fut l'exécution de Blois, dont il luy communiqua si peu*  
*le dessein, que le desplaisir d'avoir plustost sceu l'eue-*  
*nement que le proiect d'une action que le Cardinal*  
*de Bourbon luy reprocha, la porta dans onze iours*  
*apres au tombeau: Et c'estoit ce que le Roy pouvoit*  
*faire à la sienne; c'est à dire, à sa Mere. Nous ne*  
 sçavons si tu veux dire, que le Roy devoit faire  
 mourir sa Mere de desplaisir ou autrement, dans  
 onze iours; ou que tout ainsi que le Cardinal de  
 Bourbon dist à la Royne Catherine, qu'elle avoit  
 approuvé le mal qui avoit esté faict (ce qui est  
 par ton tesmoignage contraire à la verité) aussi  
 que le Cardinal de Richelieu à deu persuader ce  
 qui est faux (pour ietter dans vn regret mortel la  
 Royne Mere) qu'elle avoit, comme tu escris, *tra-* Pag. 82,  
*versé les affaires d'Italie, Et entretenu des intelligen-* 83.  
*ces où l'on l'avoit engagée.* Tout ce que ie peux ti-  
 rer de l'obscurité de ton discours, est, qu'en tout  
 sens il est tres-malicieux; que sur des impostures  
 en l'exemple, & en l'application, tu donnes vn  
 conseil pernicieux & detestable; & qu'il semble,  
 que



que tout ainſi que ce que tu dictſ contre la Royne Catherine, qu'elle ne ſceut pas le deſſein du meurtre de Blois, va pluſtoſt à la deſcharge de ſa reputation qu'à la charger de quelque blaſme; auſſi que tu le rapportes ſans iugement contre toy meſme, & que tu l'employes hors de propos contre la Royne Mere du Roy, n'y ayant rien eu dans les affaires d'Italie, qui approche du maſſacre de Blois.

Pag. 83.

Mais on ne te ſçauroit pardonner ce que tu dictſ, *que le Roy uſa de toute ſorte de remonſtrances & de prieres, pour diſpoſer la Royne ſa Mere à ſe departir de ſes intelligences*. Nous ne voulons, pour conuaincre d'impoſture celui qui t'a baillé ce memoire, & toy qui le faiçs valoir, que la tres-bonne conſcience du Roy, & ſa cognoiſſance qui n'oublie rien. Sa Maieſté ſçait bien, qu'elle n'a point uſé de ces paroles; parce que les actions de la Royne Mere ne les ont iamais prouoquées: & nous prions bien fort celui qui te faiçt trauailler, de te commander de publier les preuues qu'il a de ces intelligences, qui ſont à la verité celles des Philoſophes: c'eſt à dire, inuiſibles eſprits, illusions

illusions & phantomes, qui n'ont point de corps, s'il n'est semblable à celuy des lutins. Mais il ne faut pour les chasser qu'un signe de croix, & un peu d'eau beniste : car pour l'esclat des armes à feu, nous n'en voulons point pour les dissiper ; nous aymons beaucoup mieux nous servir des remedes furnaturels, que des naturels.

Tu donnes du nez contre la grande pierre d'achopement, qui est la detention à Compiègne: tu dicts (pour parler à la mode) *que c'estoit une separation pour un peu* ; & apres, *qu'on retrancha à la Royne la communication avec ceux qui l'auoient portée à des extremité*. O Dieu, que ce peintre adoucit ses pieces ! elles sont tellement plates, qu'on n'y peut remarquer aucun traict, qui releue la verité. *Cette separation pour un peu* a duré cinq mois: c'est beaucoup pour vne Royne innocente, & pour vne bonne Mere. Ces rigueurs ne finissoient pas avec ce temps ; puis que la resolution qui fut apportée par le Marechal de Schombert, alloit à plusieurs années : il ne traictoit de la part de sa Maiesté, que pour disposer la Royne à prendre vne retraicte plus esloignée de la presence du Roy

que n'estoit sa prison. Laquelle vous niez, & confessez, en disant par vne contradiction manifeste: *C'estoit vne simple separation, & on luy osta les gardes trois mois apres.* c'est signe qu'elle en a eu; donc elle estoit detenuë. Ce retranchement de communication, que vous dictes, alla iusques à fouiller les domestiques, à les faire conduire deuant vn Mareschal de France par des soldats, à mettre des corps de garde sous les fenestres de la chambre de la Royne, & à ne permettre point que personne aprochast d'elle, qui fust suspect au Cardinal; qui changea le Gouverneur de Compiègne pour en mettre vn à sa deuotion, qui auoit logé vn regiment autour de la Royne, & corrompu des personnes pour luy seruir d'espions.

Pag. 85.

C'est icy où tu commences à estaler les exemples des Roynes, ou meschantes, ou malheureuses: ce qui me donnera subiect de ramasser en cet endroict tous ceux qui sont espars çà & là dans ton liure; qui est, pour dire vray, plustost vn lieu commun d'histoires, qu'un discours de bonne suinte. I'auois resolu vne fois de les eluder par le mespris, estant assuré que les sages, qui sont ceux  
aux-



auxquels nous voulons fatisfaire, iugeront qu'elles n'ont point de force, que pour monstrier, qu'en tout temps il y a eu des Roynes Meres, & femmes affligées avec iustice, & avec iniustice; ce qui ne rend pas crimineles les innocentes, & ne faiet pas innocentes les crimineles. Vne personne ne scauroit estre blasmée, que pour le mal qu'elle a faiet : on ne peut apporter contre nous qu'une mauuaise action precedente, pour donner quelque soupçon qu'on en peut auoir produict vne autre: mais les fautes d'autrui ne sont point nôtres, & ne peuuent estre employées que pour disposer les esprits foibles (qui prennent les exemples pour des raisons) à faire vne mauuaise action: elles sont comme les peintures, qui ne laissent pas de donner des mauuaises pensées, encore qu'elles ne representent bien souuent que des fables. Cela seroit suffisant pour renuerfer toutes les Histoires, que tu as recueilly avec tant de soin pour enfler le cayer de frais, & augmenter la dose de ta pension: tu serois digne de compassion pour la peine que tu as pris, si tu ne meritois la punition, pour les choses que tu as faussement

cotté, & malicieusement inuenté, adiousté, & roigné; dequoy tu ne te peux excuser, qu'en disant, que ton ignorance ou ta paresse ont faict que tu as creu à quelque compilateur d'exemples, qui t'a abusé, & t'en a vendu pour ton argent, comme tu faicts au Cardinal pour le sien, ou plustost pour celuy du Roy : ou bien il faut dire, que Dieu a permis, qu'estant calomniateur en tous les faits que tu imposes à la Royne Mere, tu as esté menteur en toutes tes Histoires vieilles & nouuelles, afin que tu sois imposteur en tout.

Pour te faire cognoistre que ie fuis, tant que ie peux, d'estre semblable à toy, ie rapporteray fidelement tous tes exemples, & les rangeray par nations. Pour commencer par la nostre, il me semble que tu trouues dans nos Annales trois mauuaises Meres ; Elisabeth de Bauiere, femme de Charles VI. Louyse de Sauoye, Mere de François Premier, & Catherine de Medicis.

Du Hail-  
lan liure  
20.

Tu dictes de la premiere, *que Charles VII. son fils estant encore Dauphin la fit conduire à Blois, & de là à Tours; & commanda au Connestable d'Armaignac de luy prendre ses ioyaux, iusques à*  
ceux



*ceux là mesmes qu'elle auoit mis en depest dans les Eglises . Il n'est pas vray que le Dauphin fit esloigner sa Mere , mais la phantasie de Charles son Mary, qui auoit perdu l'esprit,& estoit en tutele. Il alloit au bois de Vincennes voir Elisabeth , & rencontrant vn sien Gentilhomme, qui se contenta de saluer le Roy en courant : ce pauvre Prince s'imagina, qu'il y auoit quelque grand mal caché sous cette sottise ; ce qui le porta à faire ietter dans l'eau ce malheureux courrier,& à releguer sa femme à Blois, & à Tours, où elle estoit en liberté: ainsi que nous pouuons colliger de l'Histoire, qui nous enseigne, que le Duc de Bourgongne la trouua à la Messe à Marmoustier . Je ne veux pas iustifier toutes les actions de cette Princesse , qui a esté tenuë pour malicieuse : mais ie dicts , que ce qui luy arriua par la folie de son Mary, ou (comme dict du Haillan) par la meschanceté de ceux qui le gouuernoient, n'approche en rien de ce que nos iours ont veu, ny du pretexte qui a esté pris, ny de l'innocence de la Royne Mere. Il est vray que le Connestable d'Armaignac, fauory de ce temps là, fit pil-*



ler les bagues d'Elisabeth ; comme le Cardinal a faict inuentorier les meubles de la Royne Mere du Roy, & luy retient son bien: mais aussi tu scauras, que cette entreprise fut cause quelque temps apres de la mort du Connestable, qui estoit vn homme violent & malin. Apres cela on te peut dire, que ce temps de misere & de confusion, dans le renuersement du cerueau d'un Roy, ne doit point fournir d'exemple pour regler les actions d'un Prince sage, & d'un Regne paisible. Que si dans celui-là on trouua fort estrange la prison du Frere d'une Royne peu auisée, qu'auroit on dict si on eust veu la detention d'une Royne innocente, & tres-bonne Mere?

Ton second exemple est celuy de Louyse de Sauoye : tu dicts sans autheur, en ayant cité en tous les autres exemples, *qu'elle desespera Charles de Bourbon, pour auoir refusé de se marier avec luy*: comme si les Meres des Roys estoient obligées de raualer leur condition, se separer de leurs Enfans, & leur donner des subiects de mespris, de peur de fascher ceux qui les recherchent. Tu leur voudrois imposer vne necessité, qui ne  
fert

fert point de loy aux moindres vefues des bourgeois & artisans : mais ta raison est fauffe , & contraire aux aduis de tous nos Hiftoriens. Je ne veux alleguer que l'autorité d'un homme, qui est feruiteur du Cardinal, & plus veritable en beaucoup de chofes que toy, qui es menteur en tout . C'est du Chefne, lequel en son Hiftoire d'Angleterre dict avec les plus anciens, fuiuis des nouueaux, que le Connestable fut irrité par la perte du procez, que Louyse de Sauoye auoit intenté contre luy touchant la fucceffion de Sufanne de Bourbon : ce qui fut vn fubieét affez foible , pour luy faire prendre les armes contre fon Roy. Pour ce que tu dictes de Lautrec, qu'il eftoit mal traicté par la mefme Royne, & que cela ruina les affaires d'Italie, tu l'as inuenté fans produire aucun tefmoing; de peur qu'on ne le recherchaft, comme on a faict les autres que tu as cotté.

Du Chefne liure 20. de l'Hiftoire d'Angleterre: *Charles de Bourbon Connestable de France, irrité du procez intenté contre luy par Louyse de Sauoye Mere du Roy, touchant la fucceffion de Madame Sufanne de Bourbon, vint mefmes à s'oublier tellement, qu'il prit les armes pour l'Empereur à l'encontre du Roy fon Maiftre.* Belleforeft liure 6. de la Vie du Roy François, dict, *que ce procez intenté par l'aduis du Chancelier du Prat fut caufe du mefcontentement de Charles.* Il dict auffi, *qu'il se despita, parce que dans la diftribution des Gouvernemens de France, le Roy François ne luy en auoit point donné.*

La



La troisieme mauuaise Mere de nos Roys est, à ton aduis, celle que des Montagnes a chargé de grands crimes, par le tesmoignage des Vies de S.Catherine & de S.Nicaise, & par l'Histoire de d'Aubigni, trois liures excellens, & dignes des Escriuains du Cardinal ; tu as eu honte de les nommer, & nous as donné dans la veüe par l'esclat de ce grand President de Thou, qui a dict,

Thua- *que Charles IX. quelque temps deuant sa mort*  
 nus Hi- *auoit voulu enuoyer sa Mere en Pologne, sous pre-*  
 storiarū *texte d'une negociation d'importance : mais que*  
 lib.57. *c'estoit en effect pour s'en desfaire.* Il est vray que ce  
 Matrem *bon Historien a escrit quelque chose de ce que*  
 ipsam *tu dicts, & que le dessein du voyage venoit de la*  
 honesto *curiosité d'une femme, & affection d'une Mere,*  
 Regis *qui desiroit de voir son Fils dans son nouveau*  
 Polonie *Royaume. On iugera par le discours qui est*  
 in Regno *rapporté fidelement, que si Charles IX. auoit*  
 nouo in- *eu cette volonté d'esloigner sa Mere pour quel-*  
 uisendi *que temps, il auoit intention, qu'elle reuint apres*  
 colore, *qu'il auroit ruiné les maisons de Guise & de*  
 à se ab- *Montmorency, qui estoient, à son aduis, trop*  
 legare *puissantes, & le troubloient par leurs quereles*  
 consti-  
 tuerat,  
 &c.

par-



particulieres . Mais outre que personne ne peut assurer que le Roy eust arresté ces choses , desquelles on ne parle que par coniectures; que peut auoir de semblable ceste pensée , ou mesmes vne parole dicte en cholere, avec ce qui est arriué par effect à la Royne Mere , qui n'a iamais donné soupçon d'estre inegale & iniuste en ses affections, dans lesquelles sa Maiesté a tousiours eu ce qu'un aîné peut & doit pretendre, & un Roy meriter? Que ne proposez vous à ce Prince, sage & craignant Dieu , un bon & assuré exemple de Charles IX. plustost qu'un mauuais, fondé sur quelque petit despit ou coniecture? Representez luy ce que ce Roy dist deuant que de rendre l'esprit à Dieu, auquel temps on descouure les plus sincerés & meilleures intentions .

L'Historien que vous citez, dict, que les dernieres paroles du Roy Charles furent ( apres qu'il eut embrassé & baisé sa tres-bonne Mere , qui auoit beaucoup merité en son endroict) de luy recommander son Espouse qu'il aymoit vniquement , sa Fille, & son

Thuanus Histor. lib. 57.

*Quibus dictis, Regina, ut optima ac de se egregie merita parenti, post arctissimos amplexus valedixit, commendatâ uxore, quam vnicè diligebat, & filiola ex eâ susceptâ, ac postremo regni curâ.*

H

Royau-

*Rex aegritudinem suam  
causatus, quâ fieret ut  
rebus suis superesse non  
posset, curam negotiorum  
in Matris manus ut di-  
gnissima resignasse se  
dicebat, &c. donec Rex  
Polonia in Galliam ad-  
ueniret.*

Royaume : duquel, quelques iours  
auparavant, il l'auoit declarée Re-  
gente, au cas qu'il vint à deceder,  
iusques à ce que son successeur fust  
venu de Pologne. On pourroit dire  
aussi, que ce Prince mourut dans vn  
dessein qui n'est pas celuy de cet-  
te faison. Il auoit reconnu les malheurs qui  
estoient arriuez à son Estat, pour auoir osté la  
cognoissance de plusieurs affaires aux Parlemens:  
mais il iugea trop tard que c'estoit vn moyen as-  
suré, pour retenir les Grands en leur deuoir, les  
fauoris en modestie, les peuples dans l'obeissan-  
ce, & pour acquerir la reputation de Prince  
Iuste, de laisser leur pouuoir aux Cours souue-  
raines, de ne quitter iamais les chemins ordi-  
naires de la Iustice, pour se ietter dans ce-  
luy des Commissaires; qui ne sçauroient estre si  
gens de bien (comme ont esté la plus grande  
partie des derniers establis) qu'on ne les soup-  
çonne d'estre Ministres des passions de ceux  
qui sont en autorité, parce qu'ils les choisif-  
sent. Venons aux exemples des autres Prin-  
cesses,



cesses , & commençons par les Imperatrices qui ont esté nos Roy-  
nes.

Tu en proposes vne , croyant auoir trouué vn thresor , lors que tu la faiets rencontrer prisonniere à Compiègne , & plus estroictement referée , que n'a iamais esté la Royne Mere du Roy . C'est Iudith , que ton ignorance te faiet nommer Royne de la seconde race ; parce que tu n'as point sceu , que c'estoit la seconde femme de Louys le Debonnaire Roy de France , & Empereur , & fille du Duc VVelphe de la maison de Bauiere . En cet exemple ie te veux monstrier que tu es le plus effronté imposteur , le plus malin escriuain ; ou si on te veut descharger de ces crimes , le plus temeraire & ignorant , qui aye iamais employé les imprimeurs : & parce que j'ayme mieux par cha-

*Annales rerum gestarum à Ludouico Imperatore : Vxorem autem Landuni esse, & in Monasterio sanctæ Mariæ includi voluit.*

*Belleforest Historien de Cleonuille, liure 2. de la Vie du Debonnaire, dit: Louys voyant qu'il estoit comme Dauid persécuté par son fils Absalon, il tascha de sauuer son Esponse; & pour ce il l'enuoya à Laon en l'Eglise & Monastere dedié à nostre Dame; & apres on l'enuoya en Italie, en la cité de Tortonne, au pays Lombard.*

*Le mesme est dict par Marianus Scotus.*

*Annales siue Gesta Francorum incerti Auctoris, anno 834. Post iudicio Episcoporum arma deposuit, & ad agendam pœnitentiam inclusus est: uxor in Italiam ducta: proximaq; ætate ipse relaxatus, arma resumpsit, uxorem recepit.*

*Theganus de Gestis Domni Ludouici: Supradicti impij, scilicet Pipinus & Lotharius, obijcientes ei multa contraria, dixerunt Iudith Reginam violatam à quodam Bernardo, mentientes omnia, eamq; uelantes, & in Monasteriũ mittentes. Ludouicus ipse inclusus Cöpendij in Monasterio. Tunc impletum est elogium Ieremiæ: Serui dominati sunt nostri.*

rité Chrestienne te donner les dernieres qualitez, que les premieres; ie t'enseigneray ce que i'ay leu dans tous les Historiens, qui ont escrit la Vie de Louys le Debonnaire. Ils disent tous, que Lothaire & Pepin ses enfans de la premiere femme, & Princes desnaturez, ayant pris les armes contre leur bon Pere, accusèrent leur belle Mere, tres-vertueuse Princeesse, d'auoir commis adultere avec vn nommé Bernard, fileul & parent de l'Empereur; & le firent de mettre sa femme dans le Monastere, non de Compiègne, comme tu dicts, mais de nostre Dame de Laon, au mesme temps qu'ils arresterent leur Pere prisonnier, le tondirent & enfermerent dans l'Abbaye de S. Cornille à Compiègne. La femme fut aussi tost apres conduicte à Tortonne en Lombardie, où elle demeura sept ou huit mois, iusques



iufques à ce que Louys , qu'on auoit mené de Compiègne à faint Denis , fut remis dans le thrône Imperial : auquel temps deux Euefques , par l'ordre du Pape Gregoire Quatriefme , ramenerent Iudith à fon Mary, qui la receut avec grande ioye, & la reconnut innocente : Bernard ayant offert le combat, felon la couftume du temps, à ceux qui l'auoient accusée ; ce que perfonne ne voulut accepter , chacun ayant aduoüé que cette Princeffe, tref-innocente & tref-fage , auoit esté perſecutée par ceux qui croyoient qu'elle vouloit aduancer Charles le Chauue fon Fils à leur preiudice. Tu monſtres bien que tu n'as iamais leu ny Thegan, ny Nitard , que tu allegues à la marge : car outre qu'ils deſchargent entierement la reputation de Iudith , ils diſent tous deux , qu'elle fut releguée à Tortonne , non à

Theganus : *Postquam praeualuit Imperator, misit fideles suos Legatos in Italiam, ut reducerent coniugem suam saepe mendaciis afflictam: qui venientes susceperunt illam honorifice, & perduxerunt illam cum incunditate & letitia ad praesentiam Principis, qui erat tunc temporis in Aquisgranipalatio.*

Vita Ludouici Pij incerti Auctoris coactanei: *Lotharius in Monasterio S. Medardi Patrem sub arctâ custodiâ esse precepit: Vxorem eius Landuni in Monasterio sanctæ Mariæ consistere voluit.*

*Ipsè autem Aquisgranum peruenit; ibiq; Iudith Augustam, ab Italiâ reducentibus Ralhald Episcopo & Bonifacio, recepit.*

Nitardus Angilbertus: *Iudith in Longobardiam in exilium mittitur. Interea hi qui Iudith in Italiâ seruabant, audientes quòd Lotharius fugam inierat, & Pater Imperiũ regebat, Aquisgranum prosperè perueniunt, gratum munus Imperatori deferunt.*

Papyrius Massonius lib. 2. *Impudicitie crimen diluit sacramento.*

Compiègne, où tu la renfermes si estroictement. De mesme aduis sont l'Autheur des Annales de Louys le Debonnaire, Marianus Scotus, celuy qui a escrit les actions des François: ton Belleforest & Papyrius Massonius, qui a recueilly cette Histoire de tous les anciens Autheurs Allemans & François, qui me fournissent trois moyens de faux contre toy. Le premier est, que tu as impudemment menty dans le rencontre de Compiègne. Pour mieux adiouster tes exemples, tu as dict qu'une Royne ne se pourmenoit pas, qui alla de Laon en Lombardie, & reuint à Aix la Chappelle, dans vn an. Le Cardinal eust bien voulu, que la Royne Mere du Roy eust eu l'aller sans le retour: mais on a descouvert son dessein aussi clairement comme on void ton ignorance & malice, qui te deuoient porter pour  
trouuer



trouuer quelque chose de remarquable à Com-  
 piegne à escrire: que tout ainsi que Ieanne la Pu-  
 celle fut prise en ce lieu là, & brulée à Roüen par  
 la sentence d'un Euesque traistre à la Frâce, qu'el-  
 le auoit courageusement serui; ainsi que par l'ad-  
 uis d'un Prelat de ce temps, plus corrompu que ce-  
 lui-là, il falloit condamner à mort celle qui a dans  
 sa Regence conserué le Roy, & l'Estat. Ta secon-  
 de faute est, que tu compares la Royne Mere du  
 Roy avec vne Princeesse esloignée, sur vne accu-  
 sation, quoy que fausse, d'impudicité. La troief-  
 me, que tu veux iustifier le Roy, en disant qu'il a  
 traicté sa Mere, comme les Princes les plus dete-  
 stables qui soient iamais sortis du Sang de France  
 firent leur marastre, & qui en mesme temps en-  
 fermerent dans vn Cloistre celuy qui a porté la  
 qualité de Prince & Pere debonnaire, iusques à  
 l'exces qui prouoque les iniures; comme ces deux  
 enfans meritent les tiltres de cruels & maudicts  
 de Dieu, ayans esté non seulement pour ce crime,  
 mais pour toute sorte d'autres meschancetez, des  
 monstres de nature. Tu ferois mieux, à mon ad-  
 uis, de proposer à sa Maiesté l'exemple d'un bon  
 Prince,

Prince, duquel il porte le nom, qui fut Louys, le troisieme Fils de cet Empereur, qui demeura contre les poursuittes & menaces de ses freres dans le respect & seruice de son Pere: ce qui luy acquist la benediction de Dieu, la loüange des hommes, & l'Empire. Que si tu voulois faire vn beau rapport, tu deuois comparer le Cardinal à Hebo, & luy faire l'apostrophe que faict Thegan à ce Prelat, qui fut cause de l'emprisonnement de Louys le Debonnaire, qui l'auoit aduancé. Il luy dist: Il t'a reuestu de pourpre, & tu luy as mis le cilice sur le dos; il t'a logé sur le thrône de l'Eglise, & tu l'as osté de ce-luy de l'Empire. Cruel & ingrat, tu n'as pas obey au commandement de Dieu, qui a dict: *Le valet n'est pas au dessus du Maistre*. Qui t'a conseillé le mal que tu as faict? c'est, sans fau-te, celuy qui est le prince de tous les en-fans

Theganus: *Vestiuisti te purpurâ & pallio, & tu eum induisti cilicio: ille pertraxit te immeritum ad culmen Pontificale, tu eum falso iudicio voluisti expellere à solio Patrum suorum. Crudelis, cur non intellexisti præcepta Domini, Non est seruus supra Dominum suum, &c. Crudelis, quis consiliarius fuit, aut ductor tuus? nonne ille, qui est super omnes filios superbia?*



*fans d'orgueil.* Voila vne leçon faiçte pour le Cardinal , il y a huiët cens ans.

Venons aux Histoires d'Espagne, dans lesquelles tu n'es pas plus sçauant, & plus fidele, que dans celles d'Allemagne. Tu ne peux fuir ces blasmes, qu'en declarant que tu es preuaricateur en la cause que tu defens , & traistre au Cardinal qui te paye; en ce qu'au lieu de rechercher des exemples pour luy, tu en as rapporté contre luy , comme sont tous ceux dans lesquels on void ou la punition des Roynes impudiques, ou ce que le vice des mauuais enfans , & les impostures des fauoris ont faiët souffrir à des Princesses vertueuses, ou que le scandale, qu'on a veu depuis peu en France, est arriué autrefois parmy toutes les nations de l'Europe; non pas si grand, mais en quelque façon approchant de celuy de nos iours.\* Le premier entre les Espagnols est d'Vrraque, heritiere de Castille, & femme d'Alphonse II. Roy d'Aragon, surnommé le Gras : laquelle ne fut pas releguée ny emprisonnée par son mary; au contraire, elle le chassa de Castille, & s'en rédit Maistresse, au moins d'une bonne partie. Il est vray, qu'elle

\* *Alphon-*  
*sus II.*

*cognomēto*  
*Crassus,*

*fuit in fra-*  
*tres animo*  
*non satis*

*fraterno*  
*aut libera-*  
*li; ut illis*

*& sorori-*  
*bis satisf-*  
*faceret ,*

*Summi*  
*Pontificis*  
*intermina-*

*tionibus &*  
*sacrorum*  
*interdictio-*

*ne coactus.*  
*Duardus*  
*Nonnius.*

Mariana lib. 10. cap. 8.

*Ansurium ditione paternâ evertit; quod grauis-  
simi viri increpationes, ob  
malè tectas libidines, fer-  
re non poterat, &c.*

*Pudicitiam sanè, dum vi-  
xit, haud satis honestè ha-  
buit: in Saldania arce ex  
partu extinctam ferunt,  
æternum Hispania dede-  
cus: alij, cùm thesauros  
D. Isidori exportasset, in  
ipso templi limine ruptis  
visceribus, manifestâ Nu-  
minis vindictâ, expirasse.*

osta son bien à Ansure, Gentilhom-  
me tres-vertueux, & grand seruiteur  
d'Alphonse, parce qu'il l'auoit tan-  
cée pour ses horribles & publiques  
impudicitez: ce qui porta son Mary à  
la vouloir repudier, sous pretexte de  
la parenté. Mariana que tu as cité,  
l'appelle *l'eternel deshonneur de l'Es-  
pagne*: dict qu'elle mourut au chasteau  
de Saldaine, en accouchant d'un ba-  
stard; & raporte l'opinion des autres,  
qui assurent, qu'entrant dans l'Eglise  
de S. Isidore, apres auoir pillé les thre-  
sors qui y estoient, & mis ses mains  
sacrileges sur les saintes Reliques, par  
un iugement espouuentable de Dieu  
elle creua à la porte, & ses entrailles  
tomberent en terre; comme celles de  
l'ingrat Iudas, lors qu'il se pendit,  
apres auoir trahi son Bienfacteur &  
son Maistre. Il y a plus d'apparence  
qu'on doiue comparer le Cardinal à  
ce meschant Apostre, qu'à Ansu-  
re,



re, qui estoit homme de bien. Tu approcherois  
dauantage de l'Histoire du temps, si tu disois  
qu'un nommé Ander fut tué par le commande-  
ment de Iean I. Roy de Portugal, pour auoir faict  
des fausses lettres, par lesquelles il vouloit persua-  
der au Roy ( comme a tasché de faire le Cardi-  
nal ) que son frere Fernand le vouloit faire mou-  
rir, pour auoir son Royaume; & que sa Mere  
Eleonor, qui auoit aduancé le scelerat Ander, y  
estoit consentante: ce qui porta Iean à s'assurer de  
sa personne, iusques à ce qu'il eust recognu son in-  
nocence. Voila ce qui approche plus de ce qui est  
arriué depuis peu, & des lettres qui ont esté faus-  
sément attribuées à vne grande Dame, que tout  
ce que tu escris.

Duardus  
Nonnius  
Histor.  
Hispan.  
Mariana  
l. 17. c. 2.

Après t'estre rendu criminel, & punissable de  
mort, pour auoir comparé la meilleure Mere de la  
terre, à la plus mauuaise femme qu'elle aye iamais  
porté; tu prens dans la mesme Histoire d'Espagne  
l'exemple d'une Princesse vertueuse, que tu veux  
faire passer pour meschante. C'est Violans (non  
pas Violente, comme tu dicts, pour faire vne allu-  
sion malicieuse) elle estoit Royne de Castille, fem-

Mariana Rerum Hispaniæ lib. 10. c. 9. *Alphonſi animus angebatur, procreanda ſobolis curâ præcipuâ: aſſentatores, quorum in aulis Principum magnus eſt numerus, diuelli id coniugium poſſe diſputabant. Iacobus pater ad arma venit: ſed magni belli motus latiſſimo exitu mutatus eſt: Regina uterus ſenſim intumeſcere viſus eſt; ac palam grauidam eſſe compertum: inſperatâ re perculſus Regis animus, odium amore mutauit.*

*Fratrem ſuum interfecit, filium rebellem effecit, Regno pulſus eſt ob blaſphemias in Deum, lib. 14. cap. 5.*

me d'Alphonſe X. & fille de Iacques I. Roy d'Arragon. Je ne me veux ſeruir que de ton autheur Mariana, que tu n'as iamais leu, ou tu es bien malin. Il eſcrit, que Violans fut quelque temps mariée ſans auoir des enfans; & qu'Alphonſe, à cauſe de cela, la voulut repudier, pour eſpouſer Chriſtine fille du Roy de Dannemarck: mais comme on la conduiſoit en Eſpagne, Violans ſe trouua groſſe; dequoy ſon Mary fut grandement ſatisfaiçt, & en eut cinq fils, & quatre filles. Il eſt vray que ce Prince, qui fut du depuis eſleu Empereur, ſ'abandonna à toute ſorte de vices: deuint mauuais mary, plus mauuais pere, & tres-mauuais frere, ayant faiçt aſſaſſiner Frederic, qui n'eſtoit pas celuy de ſa femme (comme tu dicts) mais le ſien propre. Apres cela il chaffa ſon fils Sanctius, emprisonna ſa femme, deuint cruel,



cruel, furieux, & blasphemateur contre Dieu : ce qui porta les Castillans à luy oster le Gouuernement du Royaume, duquel il fut iugé incapable. Son Fils fut mis en sa place, & Violans se retira pour mener vne vie sainte dans Burgos, où elle mourut chargée d'années, & de merites. Mariana remarque, que deuant son decez la terre trembla, & on remarqua des grands prodiges au ciel; comme si le bonheur de l'Espagne eust abandonné le pays avec cette sainte Princeſſe.

Ces deux exemples ſont des Roynes mal traitées par leurs Maris; mais vne iuſtement, & l'autre iniuſtement; & ne peuuent eſtre appliquez à vne Roynie Mere, qui reçoit du mal par le moyen de ceux qui abuſent du nom & de l'autorité de ſon Fils: auquel vous deuriez propoſer l'exemple de Pierre Roy de Caſtille, qui receut tant de benedictions de Dieu pour auoir aymé & honoré ſa Mere; ou celui de Fernand Roy du meſme Pays, qui fut tres-heureux, & vainquit tous ſes ennemis tant qu'il reſpecta ſa Mere qui s'appelloit MARI E, & auoit eſté ſa Regente; & on remarqua que ſes affaires allerent en deſordre, lors que

Sanctius  
Hiſtor.  
Hiſpanie  
Part. 4.  
cap. 8.

l'intelligence ne fut pas si estroicte. Que ne di-  
 ctes vous aussi, que Sanctius Troisième, sur-  
 nommé le Desiré, imita Pompée Roy d'Arme-  
 nie en la tendresse d'affection enuers son Frere, a-  
 pres l'auoir vaincu plus par courtoisie que par  
 armes? Au lieu de cueillir dans les liures ces belles  
 fleurs pour les offrir au Roy, & porter les choses à  
 la reconciliation & à la paix, vous ne faiçtes vos  
 extraicts que des violences, cruautez, emprison-  
 nemens, empoisonnemens, & massacres des plus  
 proches, pour tascher de disposer le Roy à imiter  
 ceux qui s'en sont seruis. Mais la force de son bon  
 Sang, & de la crainte de Dieu, qui ont plus de  
 puissance sur son ame que vos discours & les  
 conseils du Cardinal, ne sçauroient souffrir que  
 ce que tu escriis, & que ton Maistre dict, produise  
 l'effect qu'il desire.

Rogerus de Houe- Le viens aux Histoires Angloises.  
 dem : *Emmahiemis ini-* La premiere est d'Emme Mere d'E-  
*tio sine misericordiâ ex-* doiard, *que tu dicts auoir esté empri-*  
*pellitur Angliâ; que rate* son née par son Fils : & pour donner  
*mox paratâ in Flandriam* plus d'apparence de iustice à cette  
*transuchitur, & à Nobili* action, tu appelles ce Roy le Confes-  
*Comite Balduino cū ho-* seur.  
*nore suscepta est: is, ut ta-*



*seur.* Il est vray , que l'opinion du peuple luy a donné ce nom : parce qu'il vésquit en celibat , estant marié.

Je laisse à part, qu'il y a des \* Histo- riens, qui disent qu'il ne le meritoit pas:premierement parce qu'il se laissa

conduire par les passions & mau- vais aduis de Godouuin son beau- pere, homme meschant, & qui auoit tué Alphred son frere . En second lieu , parce qu'il fut ingrat enuers

sa Mere , qui l'auoit aymé tendre- ment, & garanti des poursuites de Haroldus , que Camdenus appelle vsurpateur , ayant esté auparauant Maistre d'Hostel de Canut:les autres disent,qu'il estoit son Fils d'une pre- miere femme appelée Elfgina, ou El- duina; & qu'ayant osté la Couron- ne à son Pere,il chassa sa belle Mere avec son enfant ; qui fut esleué par le soin de Guillaume le Bastard Duc de Normandie: lequel apres que Ha-

rold

*lem virum deuit, quan- diu neceſſitas popoſcerat, ei neceſſaria gratanter miniſtrari curauit.*

\* Guilelmus Malmef- burgenſis de Geſtis Re- gum Anglorum lib. 2. Camdenus.

Polydorus Virgilius lib.8. *Emma ſanctiſſima femina bonis omnibus ſpoliatur, impulſore Go- douuino.*

rold eut esté tué , & son corps ietté dans la Tamise , ayda Edoüard pour recouurer son Royaume; qui declara Guillaume son successeur , en reconnaissance de ce bienfaict. La Mere qui auoit sauué son enfant , & qui l'auoit grandement assisté pour le remettre dans ses Estats , fut releguée par les artifices & calomnies de Godouuin , qui l'accusa faussement d'impudicité, ainsi qu'il parut par le miracle que Dieu fit , lors que son Fils (qui tesmoigna en cela son mauuais naturel) luy permist de se purger par le feu , ainsi qu'elle l'auoit desiré ; & ayant faict ses prieres & ses protestations avec larmes , elle passa & repassa pieds nuds , sans estre brulée sur des focs rouges du feu , en presence du Roy & de toute la Cour: ce qui porta son Fils à luy demander pardon avec mille ressentimens de douleur , à l'honorer tout le reste de

Du Chesne liu. 10. *Duquel miracle le Roy fort estonné; luy rendit du depuis toute sorte de bons & pieux devoirs.*

Polyd. Virg. lib. 8. *Super ignitos vomeres incescit illesa: quo miraculo Rex commotus , mirâ pietate posthac Matrem coluit obseruauitq; : pacem per 19. annos habuit.*



de sa vie, & à se conduire par ses conseils. Il regna dix-neuf ans en paix par la benediction de sa Mere; que Polydore Virgile appelle tref-saincte. Voila ton premier exemple Anglois, par lequel tu faicts voir, que tu recherches des Roynes separées de leurs Enfans par soupçon, ou calomnie d'impudicité : & si dans toute la vie d'un Roy tenu pour sainct, & qui a faict, pour acquerir ce tiltre, plusieurs bonnes actions, tu en peux descouvrir vne mauuaise, tu la proposes au Roy pour le porter à l'imiter, sans luy dire la suite & verité des choses; parce que cela seroit contraire au dessein de celuy auquel tu veux plaire.

*Du Chef-  
ne dict :*

*Elle estoit  
plus de-  
sirée à*

*la Cour  
qu'atten-  
due; tous*

*les Grands  
allerent au*

*deuant  
d'elle : a-*

*pres les sa-  
luts, elle*

*raconta*

*au Roy le  
sujet de*

*son voya-  
ge, & les*

*felonies de  
Hugues le*

*Despen-  
cier,*

Ton second exemple tiré de l'Histoire d'Angleterre, ne tesmoigne pas moins ton ignorance & ta malice, que le premier. Tu dicts, que Elisabeth Fille de Philippe le Bel, femme d'Edouard Second, & Mere d'Edouard Troiesme, fut emprisonnée par son Fils, & reduicte à mille liures de pension. Tu allegues Belleforest, n'ayant peu trouuer cette fable dans les Historiens Anglois, qui disent bien, que cette Princesse fut tref-mal traictée par son Mary grandement desbau-

K

ché

ché, corrompu par Ganeston, homme abandonné à toute sorte de vices, & qui fut massacré par les Princes du Pays, qui ne pouuoient supporter son insolence. Au credit de celui-là succederent les Spenciers, pere & fils, qui cōtraignirent la Roynes par leurs mespris & violences de s'enfuir avec son enfant, & se retirer en France aupres de Charles le Bel son frere, qui l'ayda pour se remettre dans sa dignité, & conseruer les droicts de son Fils. Elle en vint à bout par l'assistance des Grands du Pays: les Spenciers, ou Despenciers, furent chastiez; le pere ayant esté pendu, & le fils mis en pieces.\* Edoüard fut miserablement assassiné par la trahison d'Adam Euesque de Hereford, qui auoit esté esleué par ce Roy; auquel son Fils succeda, qui ne fut guere meilleur, car il tua son frere de sa propre main, & fit trācher la teste à son oncle. Quand à la pri-

Polyd. Virgilius lib. 18.  
*Hugones Spenserij, pater  
 & filius, duo insignes  
 eius indolis corruptores.*

\* Camdenus : *Eduardus II. Adami Episc. Herefordensis sceleratâ versutiâ est sublatu, qui hac verba sine interpunctionibus ad eius custodes scripsit : Eduardum occidere nolite timere bonum est : ut pro sensus varietate & illi eadem patrerent, & ipse se commodè excusaret.*

Du Chesne liure 15. dict,  
*que Edoüard III. tua son  
 frere de sa propre main.*

pri-



prison, & pension de mille liures, à laquelle tu dicts que Elisabeth fut reduicte, pas vn Historien d'Angleterre n'en parle : au contraire Polydore Virgile Italien, qui est fort veritable, & sans passion, dict sur le subiect de la mort de cette Princeesse, *qu'elle merite vne loizange immortele; parce que iamais personne ne ressentit sa puissance, que pour l'augmentation de son bien, ou pour le soulagement de son mal.* qui est vn eloge en peu de mots le plus grand qu'on puisse donner, ie ne dict pas à vne Royne, mais au plus vertueux & plus sage Roy, qui aye iamais regné. Il adioust, que quelques Princes la calomnierent pour s'estre opposée à son mary; mais il dit, qu'elle estoit obligée de secourir le Royau-me, n'ayant iamais eu intention de nuire au Roy. Il me semble qu'on doit adioster plus de foy à ce discours, qu'à celuy de Belleforest, Hi-

Polyd. Virgilius lib. 19.  
*Annus qui secutus est, nobilis fuit morte Isabella, Eduardi Regis Maritis, femina immortalitatis nomine longè dignissima : quippe cuius potètiā nemo sensit, nisi aut boni accessione, aut leuatione mali. Hac apud nonnullos Principes non caruit calumniā, quòd esset persecuta virum, tamet si non nocendi viro, sed Reipublice succurrendi causā id facere coacta est: quare profectò venianda est, si ob amorem patriæ, pro quā reliqua omnia negligenda sunt, minùs priuato officio seruierit.*

storien peu iudicieux, qui accuse cette vertueuse  
 Royne, & bonne Mere, d'impudicitez estranges:  
 qui ne dit pas en quel lieu elle fut arrestée ; qui  
 adioust, que son Fils la fit estrangler, ou assassi-  
 ner, ou empoisonner; ce qui auroit esté dit par  
 quelque autre, & qui est de tres-mauuais exem-  
 ple, pour estre proposé à vn Roy. Si Elisabeth eust  
 esté mal traictée par son Fils, il auroit eu grand  
 tort, ayant faict, pour conseruer sa vie & sa Cou-  
 ronne, tous les deuoirs d'une tres-bonne Mere.  
 Outre cela, Edoiard III. ne fondant ses preten-  
 sions sur la France, que sur les droicts qu'il auoit  
 d'elle ; il est certain qu'il ne la pouuoit affliger  
 sans vn grand preiudice, & attirer les reproches  
 de tous nos François, qui n'auroient pas man-  
 qué de marquer cette ingratitude & reduction  
 de mille liures de pension, pour vn grand Royau-  
 me, qu'Edouard s'imaginoit luy estre escheu par  
 le moyen de sa Mere. On pourroit dire, que le  
 Cardinal, auquel la Royne a donné ou procuré  
 plus de trois cens mille liures de rente, t'a faict  
 escrire, qu'une Royne d'Angleterre a esté reduicte  
 à mille liures de pension : mais on peut repartir,  
 que



que cet ingrat laisse moins à vne Royne de France, qui a apporté huiet cens mille escus, sans les autres aduantages. Cet insolent luy deuoit presenter ce qu'il faict donner par le Roy à ses ordinaires : & lors que tu as faict mention de cette somme, tu pouuois penser que tu auois deux cens liures d'auantage, pour auoir faict vn libelle infame appellé le Coup d'Estat; & que le Coup d'Estat, que la Royne fit en faisant vn Dauphin, qui est à present nostre Roy, meritoit bien qu'on la traictast pour le moins comme toy, qui escris en homme forcené; ainsi que tu pourras mieux recognoistre avec le temps, que tu ne faicts à present. Tu verras, peut estre, que tu as eu grand tort d'alleguer dans le rencontre des affaires presentes les exemples des Roynes vicieuses, sur tout impudiques ou soupçonnées, ce que la nostre n'est pas; ou des vertueuses, comme la nostre est poursuiuie comme celles-là, par les calomnies & artifices de fauoris corrompus, & detestables ingrats. Prends garde aussi, que tu faicts estat de trois ou quatre Princes qui ont tué leurs freres; que tu parles en vn endroit d'un Roy qui fit mourir son fils sans forme

de Iustice ; & de cet autre qui commanda qu'on prist son frere vif ou mort : si tu n'es pas assez sage pour considerer iusques où l'appetit d'une chetive pension a transporté ta passion , ceux qui n'ont ny l'une ny l'autre , iugeront sainement ce que tu merites , & où va le dessein de celuy qui est plus maistre de ta plume , que tu n'es de ton esprit. Tu dicts aussi que Louys XII. faillit à estre exclus de la succession de la Couronne , pour s'estre souleué contre Charles VIII. Tu allegues ton Belleforest , qui dict en termes expres , que personne n'y trouua empeschement : il adioute , que cette loy pretendüe de l'exclusion des Princes du Sang , pour auoir porté les armes contre les Roys , ne fut iamais ; tu as voulu ioindre cette menace avec celle que vous tirez de la prison de Charles de Lorraine , pour nous faire voir surquoy le Cardinal veut fonder son inuasion.

Si dans le rencontre des affaires qui se presentent , tu voulois proposer à sa Maiesté quelques exemples , tu en deuois chercher pour luy faire voir les maux qui arriuent aux Roys par la mauuaise intelligence avec leurs Meres , & les espou-  
uenta-



uentables effects de leurs maledictions. Tu en  
 verras vn dans l'Histoire d'Angleterre, rappor-  
 té par Estienne Pasquier, qui en faiët vn cha-  
 pitre tout entier : si tu voulois adiouster à celle  
 là les Espagnoles & Portugaïses, tu pouuois al-  
 leguer celle d'Alphonse, qui fut le premier qui  
 porta le nom de Roy en Portugal. Il emprisonna  
 sa Mere Therasia, & attira sa malediction, qui fut  
 suiuië à l'heure mesme d'un horrible iugement  
 de Dieu. Le Roy est assuré, que la Royne sa  
 Mere ne luy donnera iamais que des benedi-  
 ctions; le Cardinal sçait qu'elle ne prendra point  
 les voyes extraordinaires pour se vanger; & c'est  
 ce qui luy donne la hardiesse de l'offencer trop  
 librement: ce qu'il n'auroit iamais faiët, s'il n'eust  
 cognu, qu'elle pardonne plus facilement les in-  
 iures, que luy n'oublie les bienfaiëts. Et tu n'au-  
 rois garde d'escrire ce que tu escris, si tu ne  
 croyois, que la bonté de cette grande Princeße  
 la portera plustost à te deliurer des mains de la  
 Iustice, que son ressentiment ne la pouffera à te  
 faire chastier. Mais Dieu, que tu dois craindre,  
 & le S. Esprit, contre lequel tu peches en com-  
 bat-

Pasquier  
 en ses  
 Recher-  
 ches.

Lucas  
 Tuden-  
 sis.

battant la verité cogneuë, defendant le menson-  
ge descouuert, & confirmant des faux faiëts par  
des faux exemples, te fera peut estre sentir les ef-  
fects de sa iuste indignation . Je reprens la suit-  
te de ton discours.

Pag.88. Tu blasmes la sortie de la Royne,& sa retraicte  
au Pays bas : on a respondu à tes compagnons sur  
cet article. Contente toy, que la Royne peut dire  
avec ce Capitaine Grec : Nous estions perdus, si  
nous n'eussions esté perdus. Son deplorable &  
forcé despart ne pouuoit trouuer hors de France  
vn seiour plus doux ; & sa vertu n'a peu estre, ny  
plus honorée, ny moins soupçonnée, qu'au lieu  
où elle est, & parmi les personnes qui l'ont re-  
cueillie. On l'a prouué si clairement ailleurs, qu'il  
seroit ennuyeux de le redire icy ; nostre intention  
n'estant pas de contenter ceux qui nous em-  
ploient par la longueur de nos discours, ny d'at-  
tirer vn plus grand payement, mais de destrom-  
per les ignorans par la verité des choses.

Pag.89. Tu dicts vne nouvelle extraicte des vieux re-  
gistres du Cardinal, qui t'a enseigné, qu'il y a quel-  
ques années, que la Royne fit venir d'Italie en  
France



France vne bonne Religieuse, qui s'appelloit Pasithée: tu luy faiçts predire des choses, auxquelles elle ne pensa iamais. La Royne, qui sçait mieux que personne du monde ce que cette vertueuse fille luy dist, a souuent assuré, qu'il n'y a rien qui luy puisse donner quelque apprehension, ny flatter l'esperance du Cardinal, qui est semblable au malin esprit, en prophetisant le mal qu'il a enuie de faire, lors qu'il menace la Royne en termes couuers d'une prison perpetuelle: les sages iugeront, si c'est le moyen d'acheminer vne bonne reconciliation; ie n'en diray pas dauantage.

Les deux raisons que tu apportes, pour mon- Pag. 90.  
 strer que le Cardinal n'est pas tant ingrat comme & 91.  
 on le croid, rendent son peché plus infame, & le  
 noircissent au lieu de le lauer. La premiere est,  
*qu'il doit dauantage au Roy qu'à la Royne.* Outre  
 que cette raison est appuyée sur vn faux fonde-  
 ment; assauoir que les interests du Roy & de la  
 Royne sa Mere estans contraires (ce qui n'est pas,  
 n'a iamais esté, & ne peut estre) le Cardinal est  
 obligé, ayant à prendre parti, de se ietter non seu-  
 lement du costé qui est le plus fort, mais qui luy  
 L a donné

a donné plus de bien. S'il eust eu assez de prudence & de bonté pour les conseruer tous deux, n'y ayant point d'opposition que celle qu'il y a voulu mettre, il n'y a point de doute que le Cardinal passoit pour vn homme plus sage, qu'il ne sera estimé. Tu dictes, *qu'il a deu suivre le Roy, auquel il a plus d'obligation qu'à la Royne*. N'est ce pas elle qui l'a donné au Roy, & qui luy a faict donner par le Roy tous les biens & honneurs qu'il possède ? Il est vray, que pour les places, les canons, munitions, & les deniers pris au Roy, & au peuple, cela ne vient point des bienfaicts de la Royne : ce qui faict que le Cardinal, qui croid ceux-cy les plus grands, parce qu'ils sont les plus vtils, n'estime rien au pris de ce couuert les fondemens & tout le bastiment de sa fortune : la beauté des dernieres pieces luy a faict, comme aux enfans, mespriser les premieres : l'orgueil luy a persuadé, que celles-cy n'auoient pas serui pour acquérir celles-là ; & mesmes que le bonnet de Cardinal n'a point attiré toute l'autorité, & ne protege pas la puissance de celuy, qui l'a obtenu par les prieres, & aux despens de la Royne Mere du Roy.



Roy. Ce que nous ne disons pas pour faire paroistre plus petits les biens, que le Cardinal a receu de son Maistre : mais pour monstrier qu'il est le plus ingrat homme de la terre, en voulant nier, que par les bonnes graces de la Mere il soit arriué à celles du Fils , & par les deux à tout ce qu'il possede de dignitez, de biens, & d'emplois. Je renuoye à la cognoissance publique le iugement de ce different.

La seconde raison de Cleonuille pour la defence du Cardinal, est, *qu'il a achepté plus chèrement les bienfaicts de la Royne, que ceux qui les luy reprochent n'en voudroient auoir donné.* Il ne faut pas trouuer estrange, si celuy qui est arriué au dernier poinct de la mescognoissance, rendant le mal pour le bien, a passé sur le premier, lors qu'il ne veut point confesser qu'il aye receu beaucoup de chose; & sur le second, lors qu'il a l'effronterie de dire qu'il a tout acquis à haut pris; la superbe luy ayant persuadé, que le moindre de ses seruices ne seroit pas dignement recompensé par tous les Empires du monde. Ceux qui scauent l'Histoire du temps, & ont eu quelque lumiere dece qui est

Pag. 92.  
& 93.

arriué dans la conduicte des affaires de la Royne, ſçauent la monnoye que le Cardinal a baillé, que nous pouuons affurer auoir eſté toute fauſſe: ſes ſeruices n'ayant eſté que fourberies & tromperies, pour ne dire point trahiſons. Le frere du Cardinal, *que tu demandes à la Royne*, ne fut point ſacrifié à la querelle de ſa Maieſté, mais à celle de ſon frere, qui n'en fut pas trop marry, n'ayant iamais ſceu viure trois iours en bonne intelligence avec ſes plus proches, qui ſont dans le cœur les plus grands ennemis qu'il aye, & ceux qui parlent plus librement de ſes deportemens. Pour te monſtrer le bon marché qu'il a eu de tout ce qu'il tient de la Royne; vn an d'infidelité luy donna le chapeau de Cardinal, qui eſt la plus belle piece de ſon cabinet, avec laquelle il a acquis toutes les autres.

Pag. 94.

Mais il faut aduoüer, que tu loges le Cardinal au dernier point de l'ingratitude, lors que tu dicts, pour effacer par vn ſeul traict toutes les obligations qu'il a à la Royne, *qu'elle luy a fait plus de mal que de bien; & que la faueur de cette Princeſſe luy eſt autant fatale, comme la diſgrace; parce qu'il euſt eſté plus content en demeurant dans la condition mediocre*



*mediocre d'Euesque de Luffon.* A ce compte, non seulement il a achepté les honneurs, & les biens, mais on luy a liuré de tres-mauuaise marchandise, pour la bonne qu'il a donné. Ne diriez vous pas, que le Cardinal est vn de ces bons Peres du temps passé? vn S. Gregoire, vn S. Iust, vn S. Eucher, qui estoient tirez par force du desert, pour estre mis dans les Dignitez de l'Eglise? comme si on ne scauoit pas avec quelles ardeurs le Cardinal les a pourſuiuies, quelles despences il a faict faire à la Royne pour les arracher, combien d'hommes il a tenu à Rome, & de quels artifices il a vsé, pour surmonter les difficultez que sa mauuaise reputation, & les iustes apprehensions du Roy, & de son Conseil auoient formé. Apres cette qualité, sur laquelle tous ses emplois ont esté appuyez, quelle peine donna, & prit le Cardinal, pour entrer dans le Conseil estroit de sa Maiesté, qui auoit vne grande auersion de sa personne? De sorte, que tu es bien trompé, si tu crois qu'il te sera aisé de nous persuader, qu'on a faict tort au Cardinal de le tirer de son repos, pour le mettre dans les affaires. C'est luy qui les

a cherché avec tant d'ardeur & de furie, qu'il a creu, que de l'ayder pour y entrer estoit acquerir sur luy vne obligation immortele; que sa malice veut non seulement reduire à rien, mais la conuertir en mauuais office. De sorte, que le bon esprit de Cleonuille a produict vn effect contraire à son dessein: car voulant couvrir l'ingratitude du Cardinal, il l'a descouuerte en ses trois parties; qui sont d'oublier le bien receu, de le nier, & de le conuertir en mal.

Que si le Cardinal auoit les sentimens dans lesquels tu dictes qu'il est, rien ne l'empesche de chercher le repos, que la presumption qu'il a, que Dieu (que les anciens ont appellé *Neceſſité*) n'est pas plus necessaire au monde, que luy à la France; & que sa sainte Prouidence a employé, en le donnant à cet Estat, les derniers moyens qu'elle auoit pour le sauuer; comme si ceux de la Toute-puissance n'estoient pas infinis. Il est vray que ce grand Admiral est plustost battu par les tempestes, que doucement porté sur les vagues: mais il a esmeu tant de tourmentes, qu'il est obligé de prendre la haute mer, encore qu'il



qu'il aye tãtoſt tous les ports de l'Ocean de France : entreprendre d'en gaigner vn, & de relascher, c'eſt chercher, à ſon aduis, le deſbris qu'il faut fuir, en ſe tenant loing de la terre. Il ne ſe peut faire autrement, que dans ces agitations ſon petit eſtomac ne bondiſſe ſouuent : mais il ſe digere-roit luy meſme, s'il ne deuorait toute la France. Il eſt impoſſible que ceſte mare publique ne ſoit troublée par tant d'hommes & de beſtes qui entrent dedans, & que le tintamarre n'eſtourdiſſe ce bizet : mais il faut que *Moab meure dedans le bruiet*. Il croid que le ſilence, & la nuiet vont enſemble, & que la paix n'eſt que la compagne de la mort. Comment pourroit il chercher la tranquillité hors de la Cour, veu qu'il reſuſe celle que les ſages peuuent trouuer dans ſon tumulte ? Il confond toutes choſes, & meſmes ſes eſprits dans la guerre, qu'il met par tout : principalement dans la ſource des plaiſirs honneſtes, qui eſt la Maïſon Royale; & des conſolations diuines, qui eſt l'Egliſe de Dieu, qu'il afflige en Allemagne. Penſe tu que le ſuperbe Palais de Richelieu, & deux cens mille eſcus de rente paiſible, puiſſent  
faire

faire aymer la vie tranquille à vn homme, qui porte son ambition, non seulement sur toute la terre, mais sur toutes les mers? qui a sur celle-là le tiltre de Generalissime, sur celle-cy la qualité d'Admiral; & qui s'aduançe tant qu'il peut pour acquerir sur l'une & sur l'autre le nom de Souuerain. Il a dict fort souuent, qu'il veut voir où la fortune peut porter vn homme: elle n'est point la conseillere du repos, son globe & sa voile la roulent, & la poussent tousiours plus auant; & sa course ne finit iamais qu'avec sa cheute. Je sçay bien que les resolutions, ie ne dicts pas d'un Chrestien, & d'un Prestre, mais d'un sage Payen, ne deuroient pas estre de suiure cette aueugle iusques au bout; & qu'il seroit plus vtile de viure deuant que de mourir, que de mourir deuant que d'auoir vescu. Mais le Cardinal est du nombre de ceux qui ayment mieux estre surpris par le mal, que de voir le danger; & mesurant toutes choses par son vtilité, il choisit plustost de nuire à plusieurs personnes dans la puissance, que si dans la vie priuée il se nuisoit à soy mesme; ayant l'esprit ainsi faict, qu'il faut par necessité, ou que dans la

presse



presse du monde il renuerse les hommes & les villes par sa malice, ou que dans la solitude il se perde luy mesme par la folie.

Tu entreprends vn long discours, pour mon-  
 strer, *que c'est vn crime de leze Maiesté au premier*<sup>Pag. 98.</sup>  
*chef d'attenter à la personne des ministres de l'Estat.*<sup>99.</sup>  
 C'est l'apprehension du Cardinal, qui te faict  
 mettre en ieu cette question inutile. Il void qu'il  
 est impossible de raur le bien, la liberté, la repu-  
 tation, & la vie à plusieurs, sans estre dans la  
 crainte de quelque violence. Celuy qui donne  
 la terreur, la reçoit : celuy qui entreprend tout  
 sur autrui, a peur qu'on n'entreprenne quelque  
 chose sur luy. *Que si la pensée* (comme tu dicts)  
*de tuer vn homme du Conseil du Roy doit estre aussi*  
*bien vn crime en France*, comme tu veux faire  
 croire qu'il l'est en Angleterre ; toutes les prisons  
 du Royaume ne sont pas capables de retenir  
 ceux, qui apres la pensée ont eu le desir de tuer le  
 Cardinal, & tous les bourreaux ne sçauroient  
 dans vn an deffaire tous ceux qui voudroient  
 estre celuy d'un homme, qui a mis la disette par  
 tout, pour mettre l'abondance dans sa maison.

Et pour ne rien dire de ceux qui sont poussez par le zele de la Religion , que le Cardinal entreprend de ruiner; combien de prisonniers, de bannis, de proscripts, & de personnes qui leur appartiennent , combien de pauvres payfans pilliez & battus par les soldats , accablez par les impositions extraordinaires, & affligez de famine & de peste , que la mauuaise conduicte du Cardinal a mis , & entretient dans le Royaume ; combien d'Officiers de la Royne, de Monsieur, des Princes, & des Grands, chassez ou mal traictez, voudroient estre transformez pour vn quart d'heure en furies, ou en striges, pour l'estrangler dans son liët; n'estans plus retenus par la conscience , mais par l'impuissance & l'apprehension des supplices ? Considere , si tu peux , Cleonuille , si celui-là n'est pas plus digne de compassion que d'enuie, qui est contraint d'auoir plus de gardes que le Roy , qui est conserué par l'amour de ses subiects : si celui-là n'est pas malheureux qui tient ses amis pour suspects, & croid ses ennemis dangereux; qui se deffie de sa table, de son liët, & de l'air qu'il respire; & qui est contraint d'employer  
des



des escriuains, comme toy, pour aduertir qu'on se garde bien d'entreprendre sur sa vie, parce que ce seroit vn crime de leze Maiesté au premier chef; ce qui est dire en deux mots, qu'il est Roy.

Après que tu as traicté cette question assez au long, tu nous veux prouuer vne chose de laquelle on ne doute point, *que le Roy n'est point prisonnier*. Je ne serois pas si mal aduisé d'auancer ces paroles, si tu ne les auois dictes, & si tu n'auois faict des figures impertinentes, pour chercher en quelle prison estoit le Roy; comme si quelqu'un auoit eu cette fole imagination, qu'il fust enfermé entre quatre murailles, non enuironné d'artifices, qui n'ostent rien à la liberté de sa personne, mais à celle de ses grandes vertus, qui ne peuuent agir conformément à ses bonnes inclinations, lors que par vn estude & surprise estrange (dequoy Salomon le plus sage des Roys confesse qu'il ne se peut iamais garentir) on destourne ses volonteés portées au bien, on dispose de choses qui viennent à vacquer contre ses desirs, on faict reuoquer les dons qu'il a faict, que son ca-

Pag. 100.  
& 101.

Seneca  
lib. vi.  
de Benef.

binet n'est lambrissé que de miroirs qui luy representent les especes des belles choses comme tres-laidés, & que sa table est toute couuerte de ces cilindres inuentez depuis quelques années, qui d'une monstrueuse confusion de couleurs font vne figure bien faicte. Ce que nous blasmons, est le soin que le Cardinal a eu, d'oster d'aupres du Roy tous ceux qui luy pouuoient dire quelque verité; d'auoir commencé par la Royne Mere, & poursuiui en rendant suspects les Princes & Seigneurs, qui ne sont point à sa deuotion. En fin, nous te dirons avec Seneca que : *Viens, & ie te monstreray quelle est la pauvreté (ou si tu veux la prison) de celui qui possède tout : il est en nécessité d'un homme, qui luy dise ce qui est vray.* Ce que nous loions est la bonté du Roy, qui n'a consenti au mal que par surprise, & ne s'est point porté à faire tout ce que la malice du Cardinal luy a conseillé; de sorte que la rage a tiré de sa bouche des iniures contre son Maistre, qui ne suiuiot pas les passions qu'il desire de rendre les prisons de l'esprit du Roy. Mais cette aigle genereuse les rompra; prendra la liberté que  
sa



sa naissance, son courage, & sa dignité luy re-  
 commandent : & Dieu, puis que les hommes,  
 iusques aux Confesseurs, sont en defaut luy faira  
 voir l'impieté des sermens qu'on a exigé de sa  
 Maiesté, sur les choses les plus sainctes, pour l'o-  
 bliger à declarer au Cardinal tout ce qui auroit  
 esté dict contre luy, mesmes en la confession, ce  
 qui est abominable deuant Dieu; qui deteste les  
 sermens faiçts pour choses mauuaises, qui peu-  
 uent estre preiudiciables au public, ou aux parti-  
 culiers : tant s'en faut qu'il y aye peché de les  
 rompre, qu'il est plus grand de les garder, &  
 tres-grand de les extorquer; n'y ayant aucun  
 homme qui puisse, sans offencer la M<sup>te</sup> Diuine,  
 & Royale, tirer vn serment de celuy auquel il  
 doit le sien; ce qui est en certaine façon le ren-  
 dre son esgal, ou inferieur : ainsi que sceut fort  
 bien representer Charles V. estant Dauphin; lors *Du Hail-*  
 que les Deputez des Estats generaux de France *lan. l. 15.*  
 assemblez à Paris, apres la prise du Roy Iean, le  
 voulurent contraindre de iurer, qu'il ne reuele-  
 roit aucune chose de ce qui luy seroit dict.

Après auoir tasché de monstrier que le Cardi- *Pag. 103.*

nal n'est pas si meschant de tenir le Roy prisonnier, tu le rends plus criminel que s'il auoit osté la liberté à la personne de sa Maiesté, lors que tu nous faiçts cognoistre qu'il approuue tes escries, dans lesquels il desrobe la gloire au Roy, que ce Prince genereux estime plus que sa Couronne, & sa vie. Tu employes ces façons de parler : *C'est ce Cardinal qui a pris la Rochelle, qui a deliuré Cazal; bresq depuis trois ans a faiçt tous ces grands coups, que les siecles suiuaus admireront.* De grace, Cleonuille, reserue quelque chose au Roy, qui estoit au siege de la Rochelle. Ne veux tu pas que l'Histoire tesmoigne que Louys XIII. l'a prise? ou bien, si tu desires que c'est le Cardinal en la presence de sa Maiesté, ou (comme il a dict) contre son gré; mais pourquoy a il deliuré Cazal, non le Roy? Il me semble, que les troupes qui furent enuoyées pour le secours, estoient à sa Maiesté, qu'elles estoient conduictes par ses Officiers, & que ses Ordres & Finances les faisoient marcher, non le Cardinal, qui auoit quitté sa charge lors que les occasions se presenterent de la faire valoir. Quand tu assures qu'il a faiçt tout ce que nous auons veu  
de



de grand depuis trois ans, tu representes le Roy comme endormi, ou malade, ou prisonnier, durant ce temps là.

Ce qui faiët paroistre que tu n'as point de iugement, est, qu'apres auoir donné toute la gloire du Roy au Cardinal, tu loües la modestie de celuy qui approuue ton discours, & te recompense pour l'auoir faiët. Tu dicts, *qu'il a reietté des bordures*, (tu deuois dire, supports de ses armes) qui le releuoient vn peu trop. A la verité nous auons remarqué dans Fauin & du Chesne, qui ne peuvent estre suspects, qu'il n'y a ny supports, ny cimier, ny corōne, ny tourtis, ny bourlet dans l'ecusson de son Pere, personne ne l'ayant voulu flatter, iusques à ce point de luy donner quelque marque de noblesse bien releuée. Nous pouuons dire, que celle de sa Cheualerie de l'an 1585. est la plus simple, & la plus basse qui soit dans toute l'Histoire de l'Ordre: ce qui nous faiët croire, qu'elle a esté donnée à quelque extraordinaire importunité, comme celle du Surintendant. Tu dicts aussi, *qu'il a fuy des comparaisons odieuses, & les robes rouges d'une Compagnie de Justice, qui l'a voulu visiter*

*siter avec l'habit qu'on porte en allant au deuant du Roy.* Grands effects du mespris de la vanité du monde en vn homme, qui a des deuises qui brauent les Papes, les Empereurs, & les Roys: qui a faict autresfois tendre vn dais dans la Maison du Roy à Fontainebleau: qui t'a faict escrire, il y a vn an, que sa Maiesté deuoit aller au deuant de luy, comme faisoit le Roy Ferdinand à Ximenes: qui a voulu mettre les Princes du Sang au dessous de luy, qui leur refuse la main droicte dans son logis: qui se tient au liét pour n'estre point obligé de loger à la mesme main les chaires des Ambassadeurs extraordinaires des Roys: qui a permis qu'on luy aye donné, dans des Theses, le tiltre Royal de Prince tres-inuaincu: qui a plus de gardes & mieux couuers que le Roy: qui prend plaisir que des flatteurs, comme toy, le comparent au Cardinal Ximenes, auquel on a donné cet eloge insolent:

*Quin  
virtute  
mea iun-  
ctum est  
diadema  
cucullo,  
Cum mi-  
hi regnā-  
ti paruit  
Hespe-  
ria.*

*J'ay ioinct au Capuchon le Royal diademe,*

*En Espagne ay regné par puissance supreme.*

Pour dernier tesmoignage de la modestie du Cardinal tu dicts, qu'il n'a pas faict adorer son chap-



chappeau, & n'est point passé deuant son Maistre  
 comme faisoit vn Cardinal d'Angleterre, fol &  
 insolent; lequel estant fils d'un boucher fut esle-  
 ué non par son merite, mais par son vice: c'est ce-  
 luy qui pour sa querele particuliere fit mourir  
 le Duc de Buckingham parent du Roy, qui luy  
 fit repudier sa femme Catherine; qui fut si im-  
 pudent non pas de passer deuant son Maistre *Wolsey*  
 (comme tu dicts) mais d'escrire, *Moy & mon*  
*Cardinal*  
*d'York.*  
*Roy.* qui voulut vendre son Roy pour estre Pa-  
 pe; & qui estant reconnu traistre, fut arre-  
 sté prisonnier par le commandement de Henry  
 Huiëtisme, qui l'auoit aduancé, & auoit re-  
 solu de le faire mourir ignominieusement, si la  
 rage ne luy eust donné vne fieure chaude, &  
 celle cy la mort; apres laquelle il eut, comme dict  
 l'Ecriture saincte, *l'enterrement d'un asne.* Lors  
 que tu dicts, que le Cardinal est digne de loüan-  
 ge, parce qu'il n'a point imité cet insensé;  
 i'aymerois autant ouyr dire, qu'il est vn grand  
 Ministre d'Estat, parce qu'il n'est pas aux pe-  
 tites maisons; ou qu'il a vn bel esprit, parce qu'il  
 n'est pas beste; ou qu'il a vn tres beau visa-  
 ge,

ge, parce qu'il n'a pas vne hure de sanglier.

Pag. 107.

Tu reuiens à cette pretenduë prison du Roy, & t'esgayes sur ce subiect: tu contrefaiçts le grossier, en interpretant toutes choses selon la lettre, pour auoir subiect de faire des figures d'escolier. Nous t'auons expliqué en quelle façon le Roy est assiégé, & auons fait nostre declaration, que la vertu du Roy resiste encore, ne permet pas la moitié du mal qu'on veut authoriser de son nom, & ne sçait pas l'autre moitié: ainsi nous sommes contraires en tout au Cardinal, qui veut oster à sa Maiesté toute sa gloire, & la charger de tous ces blasmes; là où nous arrachons au Cardinal tout l'honneur qu'il rait au Roy, & luy donnons en la place toute l'infamie qu'il veut reiecter sur son Maistre.

Pag. 111.

Tu dicts, que nous appellons persecutions les procedures de Iustice, qui se font contre les coupables. Toute la France a veu, & la Chrestienté sçaura, ce qui s'est passé dans les poursuittes contre le Marechal de Marillac, & les violences qu'on a voulu faire pour forcer la conscience des Iuges: on a aussi remarqué à quoy ont  
abouty



abouty les accusations du crime de leze Maieſté au premier chef contre Senele, & du Val. On prie les gens de bien, & les ſages, de donner vn nom à la detention de tant de priſonniers, qui ne ſont ny accuſez ny interrogez, & encore moins iugez. On diſt, qu'ils ſont les captifs de l'Eſtat: pourquoy donc cet Eſtat ne les faiſt chaſtier pour ſa ſeureté? pourquoy ſe charge-il de leur nourriture, & la faiſt payer à beaucoup de pauvres innocens? faiſtes Juſtice, ou uſez de Clemence: nous auons ignoré en France iuſques à preſent cette inquiſition, qui n'exerce point de vertu, que celle de la patience de ceux qui ſont plus malheureux que criminels, & plus miſerables que coupables.

Cleonuille eſt bien plus cruel, pour plaire à Pag. 112.  
ſon Maiſtre: car il veut qu'on eſtrangle, & qu'on brule ſans forme de Juſtice, & figure de procez, tous ceux qui aſſiſtent les Roynes, & Freres des Roys, en leurs retraictes: & c'eſt icy où il loge toutes les Hiſtoires, que nous auons reieſté. Cleonuille tu vas vn peu trop viſte: mais pour gagner la penſion, il faut teſmoigner que le ſang

boult de zele, pour faire boiïillir la marmite. Tous  
 Pag. 113. les exemples que tu ramasses en vray pedant, &  
 compilateur de lieux communs, que tu as trou-  
 uez sous vn mesme tiltre du Polyanthea, ou du  
 Theatre de la vie humaine, ne touchent point  
 ceux que la tyrannie du Cardinal a ietté dans  
 l'oppression. Ce qui se passe aujourdhuy en  
 France, n'a rien de semblable avec ce que les sie-  
 cles precedens y ont veu, & qui est arriué dans  
 tous les Estats du monde, qui n'ont iamais porté  
 non pas selon ton aduis ( car tu n'en crois rien )  
 mais selon tes escriis, vn plus grand personnage  
 que le Cardinal de Richelieu; & selon nostre iu-  
 gement, qui sera suiui de tous les gens de bien, vn  
 si pernicieux & si violent homme; ny vn si mali-  
 cieux escriuain comme Cleonuille, lors qu'il  
 compare la Royne Mere, & Monsieur Frere vni-  
 que du Roy, à ce monstre des Princes Charles  
 d'Eureux Roy de Nauarre, qui fit faire tant d'as-  
 sassinas, qui voulut desposseder les heritiers le-  
 gitimes de la Couronne, qui fut le chef des se-  
 ditions & sousleuemens des peuples, qui fit  
 respendre tant de sang humain dans Paris, qui  
 empoi-



empoisonna le Dauphin, qui donna du poison au fils du Comte de Foix pour faire mourir son pere, qui voulut etouffer toute la race de nos Roys, qui estoit vn cruel tyran à ses subiects, traistre à sa patrie, & à son sang; & apres auoir commis vne infinité de crimes, fut brulé tout vif par vn iuste iugement de Dieu. N'auons nous pas dauantage de raison de comparer le Cardinal de Richelieu à l'Euesque de Laon, grand partisan du Nauarrois, & autant abominable que luy? lequel voyant ses trahisons descouuertes par le Dauphin Regent, duquel il estoit premier Conseiller, prit la fuitte comme vn voleur, & se retira aupres du Roy de Nauarre: ainsi que fera vn iour celuy qui t'employe; lequel recherchera la protection & assistance des ennemis de son Maistre, comme il a faict l'amitié de ceux qui n'estoient point seruiteurs de sa Maistresse.

Le reste de tes exemples inuentez, ou deguisez, Pag. 119.  
ne tend qu'à monstrier, que le Roy doit estre non seulement seuer, mais cruel enuers sa Mere & son Frere; parce que tu trouues le Cardinal en cette belle humeur de ne conseiller que des meur-

tres, prisons, bannissemens, confiscations, & proscriptions: tu veux suiure sa passion, pour poursuire ta pension; & en bon Courtisan tu accommodes ton discours aux sentimens du temps, qui ne seront pas ceux qui accommoderont les affaires, & reuniront les esprits. C'est en ce seul rencontre que le Cardinal n'est point fourbe, parce que sa furie surmontant sa dissimulation, il faict cognoistre qu'il n'en a pas assez, pour cacher le dessein qu'il feroit eclorre, si on auoit faict quelque traicté sans diminution de son autorité.

Pag. 120.  
121.

Tu me permettras aussi de te dire, que tu as oublié de mettre dans ton histoire de la reuolte du Dauphin, qui fut du depuis le Roy Louys XI. que l'insolence de Charles Comte du Maine grand fauori de Charles VII. ietta son Fils dans le desespoir; mais elle n'approchoit pas de celle du Cardinal. Tu as adiousté à la lettre, lors que tu dicts, que les confiscations des seruiteurs du Dauphin furent assurées à ceux ausquels elles auoient esté données: ce qui ne peut estre, Louys ne s'estant point retiré en France, que son Pere ne fust mort, & pour prendre la Couronne, avec laquelle il eut



eut assez de puissance , pour remettre les siens dans leurs biens , ou de moyens pour les récompenser de leurs pertes. Tu remarqueras aussi , que ceux qui venoient de la part du Dauphin, à la vérité n'estoient pas escoutez : mais on ne les emprisonnoit pas , pour auoir voulu presenter des lettres remplies de respect , comme on a faict ceux qui ont esté enuoyez au Roy par la Royne sa Mere , pour apprendre des nouuelles de la santé de sa Maiesté ; & pour faire cognoistre , que si les meschans auoient la puissance de retenir les effects des affections d'un bon Fils , il n'y auoit point de mauuais traictement qui peust empescher ceux de l'amour d'une bonne Mere.

Tu te retranches dans ton dernier exemple, Pag. 122.  
 qui est celuy du Duc d'Alençon, Frere des Roys 123.  
 Charles IX. & Henry III. tu as soigneusement ramassé dans trois liures, ce qui se passa dans les retraictes de ce Prince , & diuers mescontentemens qu'il receut. Si tu faicts estat des memoires de la Royne Marguerite , pour autre subiect que pour blasmer les Freres des Roys ; il me semble, qu'apres les auoir alleguées cinq fois, tu me  
 dois.

dois permettre de me seruir de l'autorité de cette Princeſſe, pour te faire voir qu'à la verité vne partie du mal que tu dicts a eſté faiſt au Duc d'Alençon : mais toy qui ne veux faire paroistre que des rigueurs, pour en attirer d'autres ; t'es bien gardé de rapporter ce que la Royne Marguerite a remarqué ſur les ſubieſts de tous ces mouuemens. Tu verras dans tous ces memoires , que le Duc d'Alençon eſtoit vn Prince fort ſage, fidele à ſes Freres , ennemy des broüilleries , & grandement patient : mais il n'y a point de patience , ie ne dis pas des Fils de France, qui naiſſent tous avec grãd courage, mais de ſimple Gentilhomme, qui ne fuſt forcée par les insolences & brauades des fauoris de Henry III. qu'on appelloit en ce temps là mignons. Tu n'as peu extraire ce que tu as mis dans ton eſcrit, ſans remarquer en paſſant la malice du Guaſt, homme de petite extraction , & ſi malin , qu'il faut aduoüer, que le feu Roy & le Duc d'Alençon furent retenus par vne grande crainte de Dieu , & reſpect merueilleux enuers Henry III. de n'auoir point aſſommé ou faiſt aſſommer ce gueux réparé, qui employoit toute ſorte

te



te d'impostures, faisoit mille mauuais offices, & tesmoignoit beaucoup de mespris au Frere vni- que, & Beaufrere de son Maistre. Tu auras peu lire dans le mesme liuret les sanglantes moque- ries de Maugiron, Quelus, & autres ieunes hom- mes, lesquels estans enyurez du vin de la faueur dans le bal, rioyent au nez de Monsieur d'Alen- çon; sur tout portoient le Roy, sans subiect, à luy donner des gardes, à foüiller luy mesme dans son liët, à faire emporter ses coffres en sa presen- ce, & à d'autres indignitez indignes d'un grand Prince, desquelles il faisoit apres des reparations fort basses, iusques à demander pardon avec lar- mes. Tu n'as garde d'en faire mention, parce que cela nuiroit à ton subiect; ny de dire que le feu Roy (les exemples duquel doiuent estre puissants enuers ses Enfans) chassa du Pin son Secretaire, qu'il affectionnoit grandement, parce qu'il auoit parlé vn peu hautement à la Royne Marguerite.

\* Lors que tu fais mention de l'emprisonnement des Mareschaux de Montmorency, & de Cossé, & que tu cites l'Histoire du President de Thou, pour monstrier avec quel mespris ils furent trai-

\* Thua-  
nus l. 57.  
*Inuale-  
scence in  
dies Regis  
morbo, cū  
Regina  
parens de  
morte eius  
certa de  
nono Rege  
cogitaret,  
verita ne  
per illius  
absentiā  
Montmo-  
rantius &  
Cossens  
quidquā  
moliren-  
tur, eos  
in potesta-  
te habere  
constituit.*

nez à la Bastille; tu ne dicts pas le subiect qui est remarqué par ce graue Historien: assauoir, que ce n'estoit pas pour quelque mal qu'ils eussent faict, mais pour l'apprehension qu'on auoit, qu'après la mort du Roy Charles, en attendant le retour d'Henry III. ils ne fissent du bruiet, pour se vanger de leurs ennemis. Tu as aussi malicieusement supprimé le iugement que faict ce grand homme d'Estat de cette violence, & les Eloges qu'il donne à ces deux grands personnages, & bons François.

Pag. 124.

Ta rage, ou plustost, celle de ton Maistre, paroist dans les exemples de cruauté, que tu proposes. Tu dicts, *que la Royne Catherine fut sur le point de faire passer le pas au Duc d'Alençon, & que le Roy Henry III. commanda qu'on le prist vif ou mort, lors qu'il se retira à Dreux.* La premiere chose que tu as mis en auant sans autheur, est fausse; la seconde est vne marque de cholere aueugle, qui ne doit point estre représentée à vn Roy, ny au public, pour regle de Iustice, mais pour faire abhorrer les conseils des meschantes passions. Tu deuois adiouster ce qui est dans les memoires, qui  
t'ont



t'ont fourny ce beau discours , que Henry III. auoit voulu entreprendre sur la vie de la Royné Marguerite, qu'il auoit fait enleuer Madamoiselle de Thorigny pour la faire noyer, qu'il auoit esté autheur de l'assassinat du Braue Buffi , lequel fut attaqué par trente hommes en se retirant du Louure. Tu approuues toutes ces choses avec le massacre de Blois; tu cognois l'humeur du Cardinal , & sçais que son ame bourrelée ne pense qu'à des bourreaux , & que son sang ardent se rafraischit dans les meditations cruelles. Nous apperceuons bien où tendent tes discours : nous auons sceu ce que la rage a faict dire au Cardinal; ellet'a porté à menacer de prison perpetuelle la Royné Mere du Roy , & tu en as touché quelque chose : elle a passé plus auant , & a dict qu'il feroit voir à la France ce qu'elle n'a iamais veu, vn Frere vnique d'un Roy sans Enfans, fournir le subiect d'une lamentable tragedie. Il croid preparer les esprits à ces cruantez tyranniques, en te faisant ramasser & publier les exemples des plus mauuaises actions , que nos Roys , ou les estrangers ayent faict, ou voulu faire, ou que tu

leur imposez faussement ; perdant le iugement iusques à ce point , qu'en approuuant les violences qu'on vouloit faire au Duc d'Alençon , vny d'affection & d'interest avec le Roy de Nauarre, qui a esté du depuis nostre Roy tres-generoux & tres-clement Henry IV. il semble que tu estimes les resolutions , qui faisoient perir nostre bon Roy , Monsieur , & trois grandes Princeesses dans la source de leur vie. On te prieroit , si tu auois des yeux , de prendre garde où te porte ton auenglement , ou plustost où va celuy du Cardinal, qui te paye pour escrire ces choses.

O le grand subiect que nous auons de loüer eternellement les misericordes de Dieu, de ce que nous auons vn Roy, qui le peut remercier comme Salomon , *pour luy auoir donné vne ame si bonne* , qu'elle ne peut receuoir les mauuais impressions ny les conseils de tenebres , que cet escrit, le plus meschant de tous ceux qui ont esté imprimez, a mis au iour ! N'auons nous pas raison de dire , sans estre coupables deuant la Diuine Maiesté d'vn iugement temeraire , qu'il faut que les esprits , qui publient ce que nous auons

remar-



remarqué , ayent des barbares & tyranniques desseins? puis que la dissimulation, de laquelle ils font si grande profession, n'a peu retenir ce qui a eschappé non seulement à leur langue , comme nous auons sceu ; mais qui a coulé de leur plume, comme nous auons leu.

Cleouille ayant esté dans tout son liuret vn Pag. 132.  
serpent, qui a tasché d'empoisonner l'air avec ses siffilades, & de blesser à mort la belle reputation de la Royne Mere, & de Monsieur Frere vnique du Roy , a voulu estre scorpion en picquant par la fin & la queüe de son ouurage, qu'il a conclu en cette façon: *De quoy se pouuoient ils plaindre? De rien certainement , si ce n'est peut estre de l'ignorance de ces funestes deuins , qui leur auoient promis sur la derniere maladie du Roy , ce que les astres plus amis de la France que de leur ambition, ne leur ont pas voulu tenir . C'est l'imposture qui a donné dans l'esprit du Roy le coup de mort à l'Innocence , laquelle n'a iamais eu la curiosité de rechercher la fin des années de sa Maiesté , ny la malice pour la desirer : elle sçait, que la Religion Chrestienne ne permet pas*

qu'on face estat des sciences qui sont defenduës dans l'Eſcriture ſaincte; parce qu'elles entreprennent ſur la cognoiſſance de l'aduenir, de laquelle Dieu eſt auſſi ialous que de ſa gloire. Cette grande Princeſſe n'ignore pas, que la nature ne peut ſouffrir, ſans ſe perdre, qu'une Mere ſoit marrie de la ſanté de ſon Enfant; & que la raiſon ſeroit tout à faiët eſgarée, ſi la paſſion luy faiſoit meſpriſer ſes aydes & ſes appuys. On a faiët le procez à ceux qu'on aſſuroit auoir eſté conſultez ſur cet article: les Commiſſaires les ont deſchargez de ce crime, n'ayant rien trouué qui meritaſt la mort; à laquelle ils deuoient eſtre condamnez, ſi ce que le Cardinal dict en la Declaration faiëte au Parlement, & ce que tu eſcris, eſtoit veritable: mais puis qu'un homme de ſa condition a oſé mentir, & prendre la qualité d'impoteur dans le Senat où il a celle de Conſeiller; il ne ſe faut pas eſtonner, ſi toy qui n'es qu'Aduocat ſans droit & ſans cauſe, as voulu eſtre calomniateur, en plaidant vne mauuaiſe cauſe: & ie crains fort qu'il ne ſoit ordonné vn iour, que tu corrigeras ton plaidoyé.



Je te laisse pour aduertir ton Maistre, qu'il a eu tort de dire au Roy, ce que nous auons appris depuis peu, que nous blessions indirectement sa M<sup>te</sup> dans nos escris; dans lesquels elle est traictée avec beaucoup plus de respect, sans comparaison, que dans les tiens, & ceux de tes compagnons : qui l'offencent directement en sa personne, lors que vous l'accusez de precipitation & temerité en ses promesses, d'iniustice & ingratitude enuers le Cardinal; vous blessez sa dignité, lors que vous luy ostez la gloire, de laquelle sa M<sup>te</sup> est autant ialouse comme de son liect, ou thrône Royal : & pour le faire paroistre vn petit Roy, vous ne parlez que de ce grand Cardinal, qui a pris la Rochelle, secouru Cazal, faict (comme vous dictes) tout ce que nous auons veu de remarquable depuis six ans; & le comparez avec vn Cardinal qui a gouuerné vn Royaume sous la foiblesse d'vne femme. Faut il trouuer estrange, si apres cela on publie que le feu Roy estoit vn factieux & broüillon, & si on approuue les desseins de ceux qui ont entrepris sur sa personne, pour perdre le Roy dans sa source? Tout cela est directement attaquer  
 le

le Roy : sur tout , lors que dans vn Royaume où la naissance donne la Couronne , on deschire la reputation de la Royne Mere de sa Maiesté ; & pour monstrier que les violences qui ont esté faites à son Innocence ne sont pas sans exemples , on rapporte ceux des Roynes , ou conuainciës , ou soupçonnées d'impudicitez : qu'on adiousté à cela , qu'elle est iniuste en ses affections , n'en ayant point pour son aîné , contre lequel vous dictes , que non seulement elle a faict des factions dans la France , & des trahisons au dehors ; mais qu'elle a recherché & désiré la fin de la vie de son Enfant , & de son Roy. Ce sont les blasmes qui attaquent le Roy , & vont droict à luy ; ou il faudroit que la parole de Dieu ne fust point veritable ; lors qu'elle ayant dict , *que la gloire du Fils vient de l'honneur du Pere* , il ne faut point douter , que cela ne s'entende aussi de la Mere.

Les eaux des belles fontaines retiennent le goust & les qualitez de leur source , non de la main d'un fontanier. Les fruiçts ont quelque douceur ou amertume de leur racine ; & les vins sentent le terroir qui les porte , non les appuis & eschalas  
qui



qui ſouſtiennent les branches & les pampres. Les enfans tiennent plus des Meres, que des Peres: car outre ce qu'elles contribuent eſgalement pour la generation, elles fourniffent la plus grande partie de la matiere du corps, toute la nourriture de neuf mois; & quand le ventre ne ſeroit que le lieu de la demeure durant ce temps là, il laiſſeroit à noſtre tendreſſe quelques diſpoſitions & humeurs, qui nous donnent inclination, pour toute noſtre vie, au bien, ou au mal. C'eſt ce qui porte tous les hommes à vouloir defendre l'honneur de leur naiſſance, & qui a faiët prendre les armes, ou rechercher les voyes de iuſtice aux enfans, pour vanger ou faire chaſtier les iniures qui ont eſté faiëttes à leurs Meres; de peur qu'on ne leur reprochaſt ce que diſoiët les Grecs: Tu es vn mauuais œuf d'un meſchant corbeau. Louys Duc d'Anjou, ayant eſté adopté par Ieanne d'Hongrie, mena en Italie vne puiſſante armée, pour tirer hors de priſon celle qui ne luy auoit point donné la vie, mais vn Royaume ruiné & contentieux: que doiuent faire pour la liberté & honneur de leurs Meres vertueuſes les

Enfans legitimes , & ceux qui leur ont obligation pour la conseruation d'une grande, riche, & fleurissante Couronne ? Il faut prendre garde , si ceux qui accusent de mauvais naturel les Meres des Roys, n'ont point de dessein de mettre quelque tache dans leurs Enfans. Si pour confirmer cela, ils disent qu'il y a quelque defect dans les Freres (comme on en a voulu attribuer à Monsieur, & qu'on remarqueroit dans les Sœurs, si cela seruoit à ceux qui veulent rendre au Roy tout son Sang suspect ) pour faire croire que Dieu a faict vn miracle , en le garentissant des imperfections de tous les siens, desquelles il sera soupçonné avec plus de fondement, que de celles des seruiteurs , & Conseillers. Daudid estoit sainct lors qu'Achitophel estoit chef de son Conseil : Salomon a esté le plus prudent des Roys, encore qu'il aye esté surpris par des hommes malins , comme il confesse luy mesme : Charles V. entre nos Roys a esté appellé le Sage, lors que estant Dauphin il a esté trahi par l'Euesque de Laon , & qu'il fut trompé & volé sur la fin de son Regne par le Cardinal d'Amiens.

Au



Au contraire, ç'a esté tousiours vn malheur fatal à tous les bons Princes, d'auoir des mauuais seruiteurs. On les peut chasser & changer avec iustice & gloire: mais on ne sçauroit changer de Mere, ny la chasser, sans conuiction de grand crime; ny la reduire à la necessité, sans pecher contre la nature; ny la mespriser, sans se mettre en danger, par les regles de Dieu, de perdre en peu de temps ce qu'il nous a donné par son moyen. Pour les seruiteurs & Conseillers, sont des hommes que la seule fidelité peut recommander: ce sont des iettons, qui selon leur grand ou petit merite seruent pour compter vn grand ou petit nombre: sont des bastons qui appuyent la main du Prince, & qui la blessent quand ils sont rompus, ou corrompus par le vice: sont des miroirs qui nous font voir le monde; mais on les doit casser lors qu'ils le representent renuersé. C'est vne action de Iustice de chastier vn Ministre d'Estat, qui faict plus de cas de ses interets que de ceux de son Maistre; & c'est vn témoignage de bôté & de sagesse, de preferer les veritables affections de son Sang aux feintes prote-

stations des valets, qui font semblant de soustenir vne Couronne, pour arracher les pierreries & les fleurons qui l'embellissent; & sont dans les confusions des guerres qu'ils esmeuent, comme les larrons qui nous appuyent dans vne presse, pour auoir le moyen de mettre la main dans nostre poche, & emporter nostre bourse. Les imperfections de ces gens là peuuent estre contre les Roys; mais ne peuuent point donner desfiance qu'elles soient dans les Roys: elles feront dire, qu'ils sont trompez (ce qui n'est pas vn peché) mais non pas qu'ils ayent des inclinations mauuaises, dequoy on soupçonne ceux qui sont sortis d'une mauuaise Mere. Il leur est loisible, & peut estre aduantageux, d'esloigner vn Conseiller: mais il ne leur est point permis d'affliger vne Mere innocente; & il leur est peu honorable, & tres-dangereux, de souffrir qu'on la blasme. La prouidence de Dieu n'est pas si pauvre, ny le Roy & son Estat en si petite consideration aupres de sa Maiesté Diuine, qu'elle ne puisse & vueille donner vn bon Conseiller à la France: mais sa puissance, quoy qu'infinie, ne scauroit enuoyer



enuoyer au Roy vne autre Mere , si les mauuais traictemens & la douleur luy auoient rauy celle, de laquelle les ordres du Ciel l'ont faiët naistre. Nous auons voulu mettre ces considerations à la fin de cet ouurage, pour monstrier que le Roy n'est point offencé indirectement, comme on luy a voulu persuader, dans les blasmes qui sont donnez à son principal Ministre; & qu'il est attaqué directement en ceux qu'on impose à sa personne, à celles du feu Roy son Pere, de la Royne sa Mere, & de Monsieur: ce qui ne peut estre representé à sa Maiesté, à cause de la tyrannie du Cardinal; qui ne scauroit accabler l'Innocence, ny faire taire la Verité. Il a par vne lasche vengeance rauy le bien de ceux qui les soustiennent: mais il n'est pas en son pouuoir de confisquer leur esprit, leur cognoissance, leur courage, & leur fidelité.

F I N.























